

Is Meupiya He Tudtulanen Te Keagi Ni Jesu Kristu Sumalà Is Keguguza Ni Marcos

Is Mehitenged te Surat ni Marcos

Egkemenumenu emun hadi is sevaha he etew wey suluguen daan sikandin? Inseysey ni Mateo he, “Hadi si Jesus” ne si Marcos iyan kandin he inseysey he, “Suluguen si Jesus he mid-antus te merasey.” Si Mateo iyan kandin he mibpesuratan is menge Hudiyu, ne pinaagi zutun impesavut din kandan he iyan en si Jesus sikan is hadi he ebperetengen dan. Ne si Marcos iyan kandin he mibpesuratan is kenà menge Hudiyu. Ne egkesuatan din he metueni zan he nehimu si Jesus he suluguen su wey zin mehimu te edlibri te silut is langun he edtuu kandin.

Kayi te surat ni Marcos impurung din iseysey is nengaantus ni Jesus he merasey wey is menge meregen he egkaantus te etew he egkehimu he sumusundan ni Jesus. Dutun te timpu te ked-ubpà ni Jesus kayi te kelibutan mid-isip din he suluguen sikandin te Megbevayà wey suluguen daan te menge etew. Ne egkesuatan din he med-iring kandin is menge etew he ebpesakup kandin, ne mibpesarig sikandin he edsuhulan din is etew he ebpurung edsunud kandin.

Is Kedsangyew ni Juan Megbebewtismu

(Marcos 1:1-8; Mateo 3:1-12; Lucas 3:1-18; Juan 1:19-28)

1 ^{1,2}Si Esaias, is tipehuna he ebpeneuven dengan te Megbevayà, insurat din is Lalag te Megbevayà duen te Anak din, ne iyan haazà puunà te Meupiya he Tudtulanen te keagi ni Jesu Kristu he Anak te Megbevayà. Migkagi is Megbevayà te,
“Duen keuzemà ibpehuna ku kenikew
he etew he ibpepenudtul ku he megaan ka ebpekeuma.

³ Diyà sikandin te tanà he wazà duen ed-ubpà he etew.
 Ne zutun egkezineg sikandin te minge etew he edangep kandin
 is egkagi te, ‘Megaan ebpekeuma is Nengazen.
 Higewani niw is ibayè din;
 tendanga niw is dalan he ed-ikulen din,
he ke và dà egkegiya,
 endami niw is kebpekeuma zin.’ ”

⁴ Ne netuman haazà diyà te ki Juan, sikan is migeraran ki
 Megbebewtismu, su ziyà sikandin te tanà he wazà duen ed-ubpà he
 etew ne midweliyan din daan is minge etew. Ke sikandin te, “Iniyugi
 niw is memezaat he ulaula ne mebpebewtismu kew su wey metueni he
 mid-iniyugan niw en is memezaat he ulaula niw, ne human egkepesaylu
 te Megbevayà is minge salè niw,” ke si Juan. ⁵ Ne zutun, mezakel he
 minge etew is midangep kandin he ebpemuun diyà te minge inged te
 tivuuk he prubinsya he Hudiya wey minsan is minge etew he ebpemuun
 diyà te inged he Hiruselim. Ne haazà he minge etew, intangdù dan is
 minge salè dan ne mibewtismuwan sikandan ni Juan diyà te wahig he
 Hurdan.

⁶ Ne heini si Juan, kukumbalà te midhavel he vulvul te kemilyu ne
 vevakes te lundis he negangu. Ne is keuyagan din ne terapan wey teneb.
⁷ Ne zutun midweliyan ni Juan is minge etew, ke sikandin te, “Duen etew
 he ebpekeuma he ed-ilis kediey. Iyan sikandin utew lavew kenà siak su
 minsan is kepul-ut dà te minge sepatus din, kenè e pa zait he suluguen
 din. ⁸ Wahig is ibewtismu ku keniyu, iyan, haazà he etew is ed-ilis kediey,
 iyan ibewtismu zin keniyu sikan is Wagas he Mulin-ulin, *he ke và dà*
egkegiya, ibegey zin keniyu is Wagas he Mulin-ulin.”

Is Kebewtismuwi Wey is Kebpenulaya ki Jesus
(Marcos 1:9-13; Mateo 3:13–4:11; Lucas 3:21,22; 4:1-13)

⁹ Ne zutun te timpu te kepemewtismu ni Juan, nekeuma ziyà te ki
 Juan si Jesus is ebpuun diyà te inged he Naserit he ziyà te prubinsya he
 Geliliya. Ne mibewtismuwan sikandin ni Juan diyà te wahig he Hurdan.
¹⁰ Ne te egaun en si Jesus dutun te wahig, segugunè din naahà is langit he
 nepuwasan ne is Wagas he Mulin-ulin, edlugtanà diyà te kandin he iring
 te merepatik. ¹¹ Ne zutun nezineg is Megbevayà diyà te langit he egkagi
 te, “Minahal ku sikew he anak ku. Uteu ku en sikew igkeliye.”

¹² Ne segugunà dutun, impehendiyà si Jesus te Wagas he Mulin-ulin te
 tanà he wazà duen ed-ubpà he etew. ¹³ Ne zutun mekeubpà si Jesus seled
 te kepatan he andew, ne migezaman sikandin ni Setanas ke ebpekesalè
 be. Ne zuen daan dutun minge ebpekekaid he minge langgam, iyan,
 mibeyaan si Jesus te minge velinsuguen te Megbevayà ne mid-eliminahan
 dan sikandin.

Is Kebpuun ni Jesus te Kebpenurù
(*Marcos 1:14,15; Mateo 4:12-17; Lucas 4:14,15*)

¹⁴Ne hein impezakep en ni Hadì Hirudis si Juan, midlikù si Jesus diyà te prubinsya he Geliliya ne impesavut din dutun te minge etew is Meupiya he Tudtulanen he ebpuun te Megbevayà. ¹⁵Ne ke sikandin te, “Iyan en heini timpu he egketuman sikan is nengetagnà dengan su megaan en edhadì keniyu is Megbevayà. Iniyugi niw en is memezaat he ulaula ne tuu kew te Meupiya he Tudtulanen.”

Is Ked-umawa Zuen te Heepat he Menlelaya
(*Marcos 1:16-20; Mateo 4:18-22*)

¹⁶Ne sevaha he andew zutun, te edhipanew si Jesus diyà te veyvey te ranew he Geliliya, ne neehè din ensi Simon wey is hazi ni Simon he si Andres he ebpenlaya zutun te ranew su minge menlelaya sikandan. ¹⁷Ne migkagi si Jesus diyà te kandan te, “Menunuges kew ves te pait? Duma kew kedì ne etew mulà is egkekuwa niw wey zan mekesundan kedì.” ¹⁸Ne zutundutun mid-engked dan is ebpenlaya ne miduma zan kandin.

¹⁹Ne midlaus medhipanew ensi Jesus ne zutun te kedhipanew zan en, naahà ni Jesus ensi Santiago wey is hazi ni Santiago he si Juan he minge anak ni Sibidiyu he ebpurungan dan is minge laya zan diyà te avang dan. ²⁰Ne te naahà ni Jesus sikandan, mid-umew zin sikandan he meduma zan kandin, ne zutun mid-ewaan dan is amey zan wey is minge sinuhulan dan he menlelaya zutun te avang ne miduma zan ki Jesus.

Is Etew he Midsuukan te Mezaat he Mulin-ulin
(*Marcos 1:21-28; Lucas 4:31-37*)

²¹Ne midhendiyè dan te inged he Kepirnaum, ne hein neume en is andew he Sebadu he iyan Andew te Kedhimeley ne midseled si Jesus diyà te simbahan te minge Hudiyu ne mibpenurù din is minge etew zutun. ²²Ne haazà is minge etew, hein nezineg dan is kebpenurù din, utew zan nengeinuinu su is kebpenurù din, ne kenà iring te kebpenurù te minge menunudlù te kesuguan te minge Hudiyu su zekelà mulà is gehem ni Jesus te kebpenurù.

²³Ne zutun te kemulu pa ebpenurù si Jesus, netekew zan te nekeuma zutun te simbahan is maama he edlelengen te mezaat he mulin-ulin. ²⁴Ne hein neehè din si Jesus, mibensag sikandin is egkagi te, “Sikew, Jesus he tigNeserit, hengkey is lavet nu kenami te minge mulin-ulin? Kela ke iyan inhendini nu is edezeetan key kenikew. Egkekilala ku sikew; iyan ka kes hadì he mibpili te Megbevayà!” ²⁵Ne migkegiyan ni Jesus haazà is mezaat he mulin-ulin te, “Med-engked ka ne awè ka keniyen te kandin!” ²⁶Ne zutundutun midhimu te mezaat he mulin-ulin he mevidbid haazà is etew ne impepengulahì din te mezaging.

Ne mid-awà haazà is mezaat he mulin-ulin puun dutun te etew. ²⁷Ne utew nengeinuinu is langun he menge etew zutun, ne tenged dutun mibpelelelagè dan te, “Hengkey vuwa heini? Kela ke vegu en heini he tuluuwen su maan is utew sikandin mekegegehem te kebayaàbayà te minsan menge mezaat he mulin-ulin, ne ebpermineg kandin.” ²⁸Ne pinaagi zutun segugunà nekeeneb is bentugan ni Jesus diyà te tivuuk he prubinsya he Geliliya.

Is Kebewii te Menge Etew

(Marcos 1:29-34; Mateo 8:14-17; Lucas 4:38-41)

²⁹Ne mid-awà ensi Jesus dutun te simbahan ne midhendiyè dan te valey eni Simon wey ni Andres. Ne miduma zaan kandan si Santiago wey si Juan. ³⁰Ne egkezeruwan dutun is enugang he vahi ni Simon ne edhidhizegà su edetengen. Ne te kebpekeuma ni Jesus dutun te valey, migkegiyan dan si Jesus he egkezeruwan is enugang ni Simon. ³¹Ne mibayaan sikandin ni Jesus ne migewezan din diyà te velad ne impeenew zin. Ne zutundutun ne naawà is dateng din ne midsuba sikandin te ibpekaan din engki Jesus.

³²Ne hein edsanlep en is andew zutun, is langun he egkengezeruwan wey is ebpenlelungen te mezaat he mulin-ulin, mibpen-uwit sikandan te menge etew ziyà te ki Jesus. ³³Ne utew mezakel he menge etew zutun te inged is netipun diyà te lama te valey he zutun si Jesus. ³⁴Ne zuen mezakel he egkengezeruwan dutun te migkelingulingu he menge zaru is nengeulian ni Jesus. Mezakel zaan he menge mezaat he mulin-ulin is impemaawè din puun dutun te menge etew. Ne haazà is menge mezaat he mulin-ulin, wazà tuguti ni Jesus he mekekagi sikandan su nekilala zan ke hentei si Jesus.

Is Kebpenurù ni Jesus Diyà te Menge Simbahan

(Marcos 1:35-39; Lucas 4:42-44)

³⁵Ne hein egkepkepawè en, ne mid-enew si Jesus ne mid-awà diyà te valey ne midsivey sikandin diyà te wazà duen etew su ed-ampù. ³⁶Ne hein nepawà dutun mibpen-ahà ni Simon wey te menge zuma zin ke hendei si Jesus. ³⁷Ne hein neturedu zan, migkagi zan diyà te kandin te, “Ebpen-ahaan ka te langun he menge etew.” ³⁸Iyan, migkagi si Jesus diyà te kandan te, “Edhendiyè kiw te menge zuma he inged su wey ku meweliyi zaan su umba midhendini a su edweliyan ku is menge etew.” ³⁹Ne mid-eneb eni Jesus is langun he menge inged diyà te prubinsya he Geliliya ne midwali sikandin diyà te menge simbahan te menge Hudiyu zutun. Ne impemaawè din is menge mezaat he mulin-ulin puun dutun te edlelungen dan.

Is Kebewii te It-iten

(Marcos 1:40-45; Mateo 8:1-4; Lucas 5:12-16)

⁴⁰Ne zuen sevaha he it-iten he etew he mid-uvey ziyà te ki Jesus. Ne haazà he etew, midluhud sikandin diyà te etuvangan ni Jesus is ed-akul

kandin he egkagi te, “Emun meupiya zà te gehinawa nu ne egkeulian a kenikew kayi te utew meremerik he egezamen ku.” ⁴¹Ne nehizuwan sikandin ni Jesus ne midampè din te egkagi te, “Uteu meupiya te gehinawa ku; meulii ka.” ⁴²Ne zutundutun nahanewhanew zutun te etew haazà is it-it din. ^{43,44}Ne zutun mibeleuzan sikandin ni Jesus te, “Kenè nu zè pa tudtula ziyà te minsan hentei he etew heini is nehimu zini te kenikew, kekenà, hendiye ka guntaan te memumuhat he midhimu te Megbevayà wey zin maahà he neulian ka ne ivegey nu kandin is ibpemuhat wey nu metuman sikan is insugù dengan ni Moises su wey metueni te langun he minge etew he tutuu iyan he neulian ke en.” Ne zutun impehipanew sikandin ni Jesus. ⁴⁵Iyan, hein mid-awà dutun haazà is etew, midtudtul zin haazà is nehimu ziyà te kandin diyà te minsan hentei. Ne tenged dutun kenè en maan si Jesus ebpekepegawagawa ke edhendutun te minge inged su egkeamur-amur is mezakel he minge etew. Diyè dà si Jesus edrigurigu te minge unayan. Ne midangep kandin is minge etew he ebpemuun diyà te minsan hendei he inged.

Is Kebewii Zuen te Eteu he Mibinting

(Marcos 2:1-12; Mateo 9:1-8; Lucas 5:17-26)

2 ¹Ne nepipira pa zutun he minge andew, midlikù si Jesus diyà te inged he Kepirnaum. Ne nezing te minge etew he ziyà si Jesus te valey zin. ²Ne nengetigum sikandan dutun te valey. Uteu mezakel is minge etew zutun ne tenged kayi wazè dan en ed-eregan minsan diyà te zeringdingan he uvey te gemawan. Ne impesavut kandan ni Jesus is Lalag te Megbevayà. ³Ne zutun, duen nemekeuma he minge etew he ed-uwit te sevaha he etew he minatey is divaluy he lawa zin. Ebintingen haazà is etew te heepat he zuma zin. ⁴Ne kenè dan ebpekeuvey ziyà te ki Jesus tenged te utew mezakel he minge etew he nengeamur-amur zutun. Ne zutun mibudsiyan dan is atep he renged ni Jesus ne hein meluag en haazà is budsi, ne midteyuntun dan diyà te ki Jesus haazà is etew he impehizgà diyà te zuyanè din. ⁵Ne si Jesus, hein nesavut din he zekelà is kedsarig dan kandin, migkegiyan din haazà is etew he minatey is divaluy he lawa zin te, “Mama, nepesaylu en is minge salè nu.”

⁶Ne zuen ebpimpinuu zutun he minge menunudlù te kesuguan ne hein nezing dan haazà is migkagi ni Jesus, neepes dan ne neisip dan is, ⁷“Tekew en egkagi heini he etew he ebpekepesaylu sikandin te salà. Edsupaken din is Megbevayà su hentei is ebpekepesaylu te minge salà, kekenà, iyan dà is Megbevayà?” ⁸Ne zutun nesavut ni Jesus he iyan haazà diyà te isip dan ne ke sikandin diyà te kandan te, “Maan is egkeisip niw is iring kenian? ⁹Su hendei zapit is egkehimu te etew zà duen? Iyan be is kebpesaylu te salà kayi te etew he minatey is divaluy he lawa zin, wey ke iyan is kegkeulii kandin wey sikandin mekeenew ne mekuwa zin

is duyanè din ne mekehipanew? ¹⁰Pinaagi te kebewii ku guntaan kayi te etew, ibpeehe ku keniyu he siak is Kakey te Menusiyà, duen ku kegehem dini te lumpad te kebpesaylu te salà.” Ne zutun migkegiyan din haazà is etew he minatey is divaluy he lawa te, ¹¹“Sikew, Mama, enew ka; kuwaa nu heeyan is duyanè nu ne uli ka.” ¹²Ne zutun, haazà is etew, mid-enew sikandin ne migkuwa zin haazà is duyanè din ne midlawang puun dutun te valey ne naahà haazà te langun he minge etew zutun. Ne is minge etew, hein neehè dan haazà ne utew zan nengeinuinu ne midalig dan is Megbevayà. Ne ke sikandan te, “Wazè tew pa keenu maahà is iring kayi!”

Is Ked-umawa ki Levi

(Marcos 2:13-17; Mateo 9:9-13; Lucas 5:27-32)

¹³Ne neipus haazà, ne mid-awà dutun si Jesus, ne midhendiyè en maan te veyvey te ranew, ne nengetigum diyà te kandin is mezakel he minge etew ne mibpenurù din sikandan. ¹⁴Ne hein nepasad haazà is kebpenerù din ne midlaus si Jesus, ne ziyà te ibayè din duen upisina te menunukut te vuhis. Ne zutun neehè din is anak ni Alpiyu he si Levi he menunukut te vuhis he ebipimpinuu zutun. Ne migkegiyan din te, “Sunud ka kedì.” Ne zutun midhitindeg si Levi ne midsunud ki Jesus.

¹⁵Ne hein egkaan si Jesus wey minge sumusundan din diyà te valey ni Levi mezakel is minge menunukut te vuhis wey minge mesinupaken he etew he nemengaan duma kandan su mezakel is nemekesundan kandin. ¹⁶Ne zuen dutun daan minge Perisiyu he minge menunudlù te kesuguan. Ne hein neehè dan he egkaan si Jesus duma zutun te minge mesinupaken wey menunukut te vuhis, nenginginsà sikandan duen te minge sumusundan ni Jesus, ke sikandan te, “Maan is egkaan si Jesus wey ed-inum duma te minge limbungan he minge menunukut te vuhis wey minge mesinupaken?” ¹⁷Nezineg haazà ni Jesus ne midtavak sikandin pinaagi te sempità, ke sikandin te, “Sikan is wazè din daru, ne kenà egkinahanglan he ebewian, kekenà, iyan dà sikan is duen din daru. Siak, wazà a medhendini wey ku ikepeengked te ed-ulaula te mezaat is minge metazeng, kekenà, iyan is minge mesinupaken te Megbevayà.”

Is Insà Mehitenged te Kedsalang Kegkaan

(Marcos 2:18-22; Mateo 9:14-17; Lucas 5:33-39)

¹⁸Ne sengeandew zutun, edsalang te kegkaan is minge Perisiyu wey is minge sumusundan ni Juan Megbebewtismu su edtumanen dan is tuluuwen te minge Hudiyu. Ne zuen minge etew he midhendiyà te ki Jesus ne ke sikandan te, “Is minge sumusundan ni Juan Megbebewtismu wey is minge sumusundan te minge Perisiyu, edsalang dan te kegkaan *su wey zan mepurungi is ked-azap dan te Megbevayà. Ne maan man is kenà mulà edsalang te kegkaan is kenikew he minge sumusundan?*” ^{19,20}Ne migkagi si Jesus diyà te kandan te, “Penenglitan

ke zuen eseweey, is minge zuma zutun te ebpengesawa, kenè dan egkeisip he edsalang dan te kegkaan ke kemulu zan pa zuma haazà is ebpengesawa. Ne zutun te timpu he ibpaawà diyà te kandan sikan is ebpengesawa, human dan edsalang egkaan. Ne iring din ded daan is minge sumusundan ku su te kemulu e pa zini te kandan, kenè dan edsalang te kegkaan.”

²¹Ne zutun insem pità ni Jesus is kenà kebpeked-amur te vegu he penurù din wey te zaan he tuluuwen. Ke sikandin te, “Is begu he manggad he wazè pa megkenseng, kenà meupiya he idapi ziyà te kumbalà he merunut en he manggad su emun ebpiplan, egkenseng haazà is begu ne egkevindas is merunut en he manggad ne tuwas pa he meluag is kegkevindas din. ²²Ne iring din ded daan is binu he sikan pa ebeeli he idtagù diyà te teleguey he lundis te kambing. Kenà egkehimu he ziyà itagù te zaan he teleguey su ebetu haazà is teleguey ne egkeulaan haazà is binu ne egkezetan daan haazà is teleguey. Kinahanglan he is binu he sikan pa ebeeli, ne ziyà idtagù te vegu he teleguey.”

Is Ebayàbayà te Andrew te Kedhimeley

(Marcos 2:23-28; Mateo 12:1-8; Lucas 6:1-5)

²³Ne zutun te sevaha he andew he Sebadu ingkevayà eni Jesus is pemuleey. Iyan haazà andew he insugù dengan te Megbevayà te minge Hudiyu he wazà etew he ibpevaal zutun he andew su iyan Andrew te Kedhimeley. Ne mibpengetù is minge sumusundan ni Jesus te trigu zutun. ²⁴Ne zutun migkegiyan si Jesus te minge Perisiyu te, “Is minge sumusundan nu, edsupaken dan is insugù kenitew te Megbevayà su maan is edlegtey zan guntaan kayi te Andrew te Kedhimeley?” ²⁵Ne midtavak si Jesus te, “Kenà egkehimu he wazè niw mevasa ziyà te ingkesurat dengan kes mid-ulaula ni Hadi David. Sikandin wey is minge sundaru zin, midlised sikandan su nengevitil zan. ²⁶Ne tenged dutun midseled si David diyà te simbahan he Valey te Megbevayà ne migkaan din is egkeenen he insavuk diyà te etuvangan te Megbevayà. Ne impekaan din daan dutun is minge zuma zin. Iyan lavew he memumuhat dutun si Ebiyatar. Supak te kesuguan haazà is kegkeena zan dutun su iyan dà ebpekekaan dutun he egkeenen is minge memumuhat. ²⁷Ne minsan pa zutun wazè dan mekesalà. Iyan aney he midlimbag te Megbevayà is etew ne human din insugù is Andrew te Kedhimeley, he ke và dà egkegiya, mahal is etew, kenà is Andrew te Kedhimeley. ²⁸Umba, siak is Kakey te Menusiya, iyan a zuen kegehém te egkagi ke hengkey is hustu he ed-ul-ulahan te etew emun Andrew te Kedhimeley.”

Is Kebewii Zuen te Etew he Minatèy is Minge Ugat te Zivaluy he Velad Din

(Marcos 3:1-6; Mateo 12:9-14; Lucas 6:6-11)

3 ¹Ne mid-uman medseled si Jesus duen te simbahan te minge Hudiyu, ne zuen dutun etew he minatèy is minge ugat te zivaluy he velad din.

²Ne zuen minge kuntada ni Jesus dutun ne mibentayan dan si Jesus su ed-ahaan dan ke ebewian din haazà is etew zutun te andew su Andew te Kedhimeley haazà. Su emun ebewian ni Jesus haazà is etew ne idsumbung dan he midsupak din is Andew te Kedhimeley. ³Ne migkegiyan ni Jesus haazà is etew he nezeetan is belad din te, “Hengkayi ka, Mama, te teliwazà.” ⁴Ne zutun mid-insaan din haazà is minge kuntada zin te, “Hendei zapit is intugut kenitew zuen te kesuguan tew he ed-ul-ulahan tew kayi te Andew te Kedhimeley? Iyan be is kedtavang te etew he edlised wey ke ebpesipelahan be is etew? Iyan be is kedtevangi ta te etew su wey kenà mebpatey wey ke edhimetayan te ve is etew?” Ne wazè dan meketavak dutun. ⁵Ne te ebpenlangulangu si Jesus dutun te mezakel he minge etew, utew zin egkepeuki sikandan ne utew zaan mibmesakit is gehinawa zin su haazà is minge etew, wazè dan kehizu. Ne zutun migkegiyan din haazà is etew he nezeetan is belad din te, “Ketenga nu, Mama, is belad nu.” Ne migketeng dutun te etew haazà is belad din ne segugunà neulii. ⁶Ne is minge Perisiyu, nemen-awè dan dutun te simbahan. Ne sikandan wey is minge sakup te upakat he midtukud ni Hadì Hirudis, mibpelelelagè dan ke hengkey is paagi he mehimu zan he mepatey si Jesus.

Is Kebewii te Minge Etew Ziyà te Beyvey te Ranew

(Marcos 3:7-12; Mateo 12:15,16; Lucas 6:17-19)

⁷Ne zutun mid-awà si Jesus wey is minge sumusundan din ne midhendiyè dan te veyvey te ranew. Ne nemenduma ki Jesus is utew mezakel he minge etew he ebpuun diyà te prubinsya he Geliliya. Ne is duma kandan, diyà ebpmuun te prubinsya he Hudiya, ⁸wey ziyà te inged he Hiruselim, wey ziyà te prubinsya he Idumiya, wey ziyà te tanà he zhipag te wahig he Hurdan wey ziyà te minge inged he siringan dutun diyà te inged he Tiru wey Sidun. Uteu mezakel he minge etew is midhendiyà te ki Jesus su nezineg dan is minge tudtul mehitenged te minge egkengein-inuwan he mibeelan din. ⁹Ne migkegiyan ni Jesus is minge sumusundan din he megkuwa zan te avang su wey zin meuntuzi emun egkelipitlipit sikandin te utew mezakel he minge etew. ¹⁰Mezakel is nengeulian din en he egkengezeruwan ne tenged kayi, is egkengezeruwan dutun, ebpenlietliet dan en is edtegel ed-uvey diyà te ki Jesus wey zan mekezampà kandin su wey zan meulii. ¹¹Ne is minge mezaat he mulin-ulin, hein neehè dan si Jesus, ne nemenluhud sikandan diyà te etuvangan din is ebpemengulahì he egkagi te, “Iyan ka iyan kes Anak te Megbevayà!” ¹²Ne zutun midawey ni Jesus haazà is minge mezaat he mulin-ulin ne migkegiyan din sikandan he kenè dan ipesavut he Anak sikandin te Megbevayà.

Is Kebpilia ni Jesus te Minge Epustul

(Marcos 3:13-19; Mateo 10:1-4; Lucas 6:12-16)

¹³Ne zutun midtekezeg si Jesus diyà te vuvungan dutun ne mid-umew zin sikan is nengepilì din he mehimu he sinerigan din. Ne mid-uvey

zan diyà te kandin. ¹⁴Ne intezù ni Jesus dutun is sepulù wey zezuwa he medumazuma kandin wey zin ikepehipanew sikandan te kebpesavut te Meupiya he Tudtulanen. ¹⁵Ne mibegayan din sikandan te gehem wey zan mevugew is menge mezaat he mulin-ulin he edlalung te menge etew. ¹⁶⁻¹⁹Iyan heini menge ngazan te sepulù wey zezuwa he etew he nengepili ni Jesus: si Simon he migeraran din ki Pedro, wey si Santiago he anak ni Sibidiyu wey is hazi ni Santiago he si Juan. Heini is dezuwa, migeraran din ki Buwenirgis, he ke và dà egkegiya, mezilapet he etew. Ne elin daan dutun si Andres, si Felipe, si Bartolome, si Mateo, si Tomas, si Santiago he anak ni Alpiyu, wey si Tediya. Ne elin daan si Simon is sevaha te upakat dengan he egngezanan te Kenenista. Ne elin daan mibpili ni Jesus si Judas he tigKeriyuti, sikan is mid-akal kandin.

Ne neipus haazà is kebpilia ni Jesus kandan, ne mid-ulì sikandin.

Is Lavew ki Setanas

(*Marcos 3:20-30; Mateo 12:22-32; Lucas 11:14-23; 12:10*)

²⁰Ne zutun ensi Jesus, wazè dan en timpu minsan te kegkaan su utew mezakel is menge etew he nengeamur-amur ziyà te kandin. ²¹Ne hein nezineg te menge kezumahan ni Jesus is egkeaula zin ne mibeyaan dan sikandin su kunaan dan ke neliveg.

²²Ne zuen dutun menge menunudlù te kesuguan he ebpuun diyà te inged he Hiruselim ne ke sikandan te, “Heini he etew, mid-ulinan sikandin ni Endedaman, sikan is egalen te menge mezaat he mulin-ulin, ne tenged kayi igkepeguwè din puun te menge etew is menge mezaat he mulin-ulin.” ²³Ne zutun, migkegiyan ni Jesus haazà is menge etew he med-uvey zan diyà te kandin ne zuen menge sempità he impenurù din kandan. Ke sikandin te, “Kenà egkehimu he ebugawen ni Setanas is duma zin he mezaat he mulin-ulin. ²⁴Penenglitan ke zuen hadi ne ebpetebtebekà is menge sakup din, megaan egkeawà is gehem din te kedhadi. ²⁵Ne ke zuen edlingahaan te sengevelayan ne ebpekunkuntedahà is menge sakup din, megaan egkevengkak is upakat dan. ²⁶Umba ke egkuntedahan ni Setanas is menge sakup din, kenà egkeuget is kegehem din te kebayàbayà, kekenà, megaan egkeawà ne egkehanew.

²⁷*Nezaag ku en si Setanas umba ebpekepaawà a te menge sakup din su wazà minsan hentei he ebpekeseled te valey te mezesen he etew he ed-agew te menge azen dutun te mezesen he etew emun kenè din egkehuna egkevaku haazà is mezesen he etew. Kinahanglan he ebekusen din edhunai, ne human din egkeagew is menge azen dutun te mezesen he etew.*

²⁸Tentenuzi niw heini,” ke si Jesus, “he egkepesaylu pa te Megbevayà is menge etew te minsan hengkey he menge salè dan wey minsan hengkey he kedsumpalit dan kandin, ²⁹nyan, sikan is edsumpalit te Wagas he Mulin-ulin, kenè en

egkeawà diyà te kandin haazà is salè din ne kenè en egkepesaylu te minsan keenu.” ³⁰Umba migkagi ni Jesus haazà su is minge menunudlù, migkagi zan he mezaat he mulin-ulin is Wagas he Mulin-ulin he ed-ulin ki Jesus.

Is Mesipeg Diyà te ki Jesus

(Marcos 3:31-35; Mateo 12:46-50; Lucas 8:19-21)

³¹Ne nekeuma zutun is iney ni Jesus wey is minge hazi ni Jesus he minge maama. Ne ziyè dan dà te gawas dutun te valey ne migkegiyan dan is minge etew he ipegawas dan si Jesus. ³²Ne utew mezakel is minge etew he ebpememinuu zutun he nekeliguy ki Jesus. Ne migkegiyan si Jesus te minge etew te, “Diyà te gawas is iney nu wey minge hazi nu ne ibpeligawang ke zan.” ³³Ne migkagi si Jesus te, “Duen ku pa ibpaahà keniyu he iney ku wey minge suled ku.” ³⁴Ne nenlangulangu si Jesus dutun te minge etew he nekelingut kandin ne ke sikandin te, “Heini zed is iney ku wey minge suled ku ³⁵su is minsan hentei he edtuman te egkesuatan te Megbevayà, iyan daan iney ku wey minge suled ku he maama, wey minge etevey ku.”

Is Sempità Mehitenged te Veni

(Marcos 4:1-9; Mateo 13:1-9; Lucas 8:4-8)

4 ¹Ne sevaha he andew zutun diyà te veyvey te ranew mid-uman penurua ni Jesus is minge etew. Ne utew mezakel is minge etew he nengeamur-amur ziyà te kandin, ne tenged kayi mid-untud sikandin diyà te avang he uvey zutun te veyvey ne zutun mebpinuu. Ne is minge etew, diyè dan dà te veyvey is ebpememineg kandin. ²Ne mezakel is impenurù ni Jesus kandan pinaagi te minge sempità. ³Ke sikandin te, “Duen etew he midhendiyà te pemuleey zin su ebpemula. ⁴Ne zutun te kebpemula zin, duen benì he nengeulug diyà te zalan, ne heini migkaan te minge tagbis. ⁵Duen daan benì he nengeulug he nemekeuntud diyà te utew menipis he tanà he nekeapid dutun te minge vatu. Ne haazà, petuluy zà midtuvù su menipis haazà is tanà. ⁶Asal hein mid-andew, negangu petuluy haazà is minge pinemula su mevavew zà is nesenevan te zalid dan. ⁷Ne zuen daan dutun benì he nengeulug diyà te tanà he minge zugiyen is minge sagbet dutun. Ne mibmemelayat haazà is sagbet ne mibpengulembezan haazà is minge pinemula ne wazà mekepemegas. ⁸Ne zuen daan benì dutun he ziyà mingeulug te meupiya he tanà ne haazà, midtuvù, ne midekelà ne nemegas mulà. Duen dutun minge pinemula he mibegas te tigketluan, ne zuen daan mibegas te tigkeneman. Ne zuen daan mibegas te tignenggatus.” ⁹Ne mid-uman megkagi si Jesus te, “Kinahanglan he sevuta niw heini is nezineg niw.”

Is Tuyù te Menge Sempità

(Marcos 4:10-12; Mateo 13:10-17; Lucas 8:9,10)

¹⁰Ne hein wazè en utew etew zutun su iyan dan dà is minge sepulù wey zezuwa he sumusundan ni Jesus wey is kenà utew mezakel he

menge etew, mid-insaan dan si Jesus ke hengkey is ibpesavut din dutun te menge sempità. ¹¹Ne ke si Jesus te, “Sikiyu is menge sumusundan ku, ibpesavut en keniyu te Megbevayà sikan is in-eles dengan mehitenged te kedhadì din, iyan, is menge zuma he menge etew, ibpenurù kandan pinaagi te menge sempità.

¹² ‘Su zutun ebpurung dan edtengteng,

 iyan, kenè dan egkeahà,

 he ke và dà egkegiya,

 ebpemineg dan, iyan, henduen be te wazè dan mekezineg su kenè dan edsevuten.

Su emun egkesavut dan ed-engkezan dan is memezaat he ulaula zan ne egkepesaylu sikandan te Megbevayà!’ ”

Is Kehulugan Duen te Sempità Mehitenged te Veni

(Marcos 4:13-20; Mateo 13:18-23; Lucas 8:11-15)

¹³Ne mid-uman megkagi si Jesus te, “Egkesavut niw ve heini is sempità he migkagi ku? Emun kenè niw heini egkesavut kenè niw zaan egkesavut is duma he menge lalag ku he pinaagi te sempità. ¹⁴Duen te sempità ku, is kehulugan te kebpemula te etew, ne iyan is kedsengyawa te Lalag te Megbevayà. ¹⁵Ne is benì, ne iyan is Lalag te Megbevayà he zuen nemekezineg duen, iyan, midlepew si Setanas ne midhimu zin he melipati zuen te nekezineg sikan is lalag he nezineg dan. ¹⁶Ne sikan is benì he ziyà meketanà te menipis he tanà he zivavew te watu, ne iyan is Lalag te Megbevayà he is nemekezineg duen, ne utew zan egkesuati te ebpemineg, ne edtuuwan dan. ¹⁷Iyan, kenà egkeheget is kedtuu zan ne kenà egkeuget, ke egkeumahan sikandan te samuk wey ke kemeresayan be tenged te kedewata zan te Lalag te Megbevayà, edlikù dan diyà te zaan he ulaula zan. ¹⁸Ne sikan is benì, he ziyà mengeulug te tanà he zugiyen is menge sagbet dutun, ne iyan is Lalag te Megbevayà he nezineg te menge etew, ¹⁹iyen, egkelipatan dan tenged te menge seeng dan kayi te kelibutan wey te kegkesuat dan te selapì wey te mezakel pa he menge azen, ne kenà ebpulus diyà te kandan is Lalag te Megbevayà. ²⁰Ne sikan is benì he ziyà meketanà te meupiya he tanà, iyan is Lalag te Megbevayà he nezineg te menge etew ne midtuu zan; ne is Lalag te Megbevayà, ne ebpulus diyà te kandan. Is duma, ne ebpulus te zeisek diyà te kandan, ne is duma, ne ebpulus te malù dekelà, ne is duma, ne ebpulus te utew zekelà diyà te kandan.”

Is Sulù Diyà te Metikang he Selevukà

(Marcos 4:21-25; Mateo 5:15; 13:12; Lucas 8:16-18)

²¹Ne mid-uman megkagi si Jesus diyà te kandan te, “Ke edtemtem is etew te sulù, kenà egkehimu he ebpelengkevan din te revan wey ke

idsihung din be te vangkù he hizegaan su idsavuk din diyà te selevukà. ²²Ne iring din ded daan is minsan hengkey he in-eles guntaan ne ibpegawagawa zed keuzemà ne is minsan hengkey he penurù ku he kenè niw egkesavut guntaan ne egkesavut niw keuzemà. ²³Kinahanglan he sevuta niw heini is nezineg niw.”

²⁴Ne mid-uman megkagi si Jesus te, “Purungi niw peminenga is penurù ku keniyu su sumalà is kebpurung niw kebpemineg, ibegey keniyu te Megbevayà is kedsavut, asal zekelè pa is ibpesavut din keniyu. ²⁵Su is etew he edewaten din is ibpesavut kandin te Megbevayà, ed-umanan pa te Megbevayà is kedsavut din, iyan, is etew he kenè din edewaten is ibpesavut te Megbevayà, id-awà diyà te kandin is deisek he nesavut din en.”

Is Sempità Mehitenged te Kedtuvù te Veni

²⁶Ne impelaus ni Jesus is egkegiyen din, ke sikandin te, “Is kedekelà te edhedian te Megbevayà, ne iring te etew he mid-ezek te veni diyà te pemuleey zin. ²⁷Wazè din hanew ke egkemenumenu haazà is kedtuvù dutun te pinemula zin, kekenà, ebpesesegazen din dà. Edlipezeng sikandin te mezukilem ne ebaal te maandew ne kada andew edtuvù ne edekelà haazà is minge pinemula zin. ²⁸Su iyan idtuvù te pinemula haazà is tanà. Edtuvù haazà is pinemula ne edlepew is dahun din ne human edlepew is begas din ne zutun human egkeayun te kegkelutui. ²⁹Ne emun egkelutuan en haazà, edregunen dutun te tegitanà su iyan en tiragun.”

Is Ked-iseg Kebmahabet te Edhedian te Megbevayà

(Marcos 4:30-34; Mateo 13:31,32,34; Lucas 13:18,19)

³⁰Ne mid-uman megkagi si Jesus te, “Hengkey is meupiya he ebpetug-iringan tew te kedhadì te Megbevayà? Hengkey is meupiya he egemiten tew he sempità? ³¹Is ked-iseg kebmahabet te edhedian te Megbevayà, ne iring te pinemula he utew zeisek is lisu zin he ibpemula haazà diyà te tanà. ³²Ne edtuvù ne edekelà ne egkehimu he iyan utew zekelà te langun he minge pinemula. Dezekelà is minge subpang din ne ebpekesesalag is minge tagbis dutun.” ³³Pinaagi te mezakel he minge sempità impesavut ni Jesus is Lalag te Megbevayà diyà te kandan sumalà is netuenan din he egkesavut dan. ³⁴Pudu minge sempità is impezineg ni Jesus diyà te minge etew, iyan, emun iyan dan dà te minge sumusundan din, ne ibpesavut din kandan is kehulugan dutun te minge sempità he penurù din.

Is Kedewaya ni Jesus te Keramag

(Marcos 4:35-41; Mateo 8:23-27; Lucas 8:22-25)

³⁵Ne hein midsanlep en is andew zutun, migkegiyan ni Jesus is minge sumusundan din te, “Edhendiyè kiw te ziyà layun.” ³⁶Ne zutun mid-

ewaan dan is mezakel he minge etew ne is minge sumusundan ni Jesus, mid-untud dan duen te avang he sikan is mibpinuuwan ni Jesus ne migenat dan. Ne zuen daan duma zutun he minge etew he nemen-aavang is eduma kandan. ³⁷Ne hein diyè dan en te lawed ne midtekwetekew mebpengeramag te utew mevendes ne egkeselikuvungan en te vagel haazà is avang ne egketeguan en te wahig. ³⁸Ne si Jesus, nekelipezeg diyà te huziyan he zulung dutun te avang he mid-uulunà. Ne migunggel sikandin dutun te minge sumusundan din he ke sikandan te, “Egkelavu kiw en! Kenè nu ve ebeliyen ke egkegerè kiw?” ³⁹Ne zutun nepukew si Jesus ne mid-ew ne migkegiyan din haazà is keramag wey vagel he med-engked dan. Ne mid-engked haazà is keramag ne mibmelinew utew haazà is wahig. ⁴⁰Ne migkegiyan din is minge sumusundan din te, “Maan is egkengehandek kew? Wazè niw pe be kedsarig kedi?” ⁴¹Ne zutun, utew nengeherati haazà is minge sumusundan din ne mibpein-inseey sikandan he egkagi is kada sevaha kandan te, “Hengkey heini vuwa he etew? Maan is minsan is keramag wey minge vagel ne ebpeineg kandin!”

Is Kebewii te Etew he Midsuukan te Minge Mezaat he Mulin-ulin
(*Marcos 5:1-20; Mateo 8:28-34; Lucas 8:26-39*)

5 ¹Ne nekezunggù ensi Jesus diyà layun dutun te ranew, ne iyan haazà is nezungguan dan tanà te minge etew he Geresinen. ²Ne zutun te kedrenà ni Jesus dutun te avang, midsinugung sikandin te etew he ziyà ebpuun te minge surung he penlevengà. Midsuukan haazà te minge mezaat he mulin-ulin ³umba ziyà ed-ubpà te minge penlevengà. Ne utew mezesen sikandin ne tenged dutun kenè en egkevaku te minsan kedina. ⁴Su neuget en, layun ebekusen is minge velad din wey paa zin, iyan, kada kebekusa kandin dutun, ne edrupeten din is pusas he ibpusas kandin, ne ebpemidtawen din dà is kedina he ibakus kandin. Wazè en ebpekeegen kandin tuus te utew mezesen. ⁵Umba, te maandew wey mezikilem, dutun sikandin edrigurigu te minge penlevengà wey minge vuntud ne edtulung ebpengulahì ne ebpeemelian din is lawa zin te watu.

⁶Ne hein nepentawan dutun he etew si Jesus diyà te meziyù, mibpelelaguy is edsinugung ki Jesus ne mid-azap kandin. ^{7,8}Ne si Jesus, migkegiyan din haazà is mezaat he mulin-ulin te, “Awè ka kenian te etew!” Ne zutun nengulahì haazà is etew he ke sikandin diyà te ki Jesus te, “Ey! Sikew is anak te utew lavew he Megbevayà, ebmenuwen a kenikew? Edhengyuen ku kenikew he peseriga a kenikew he kenè e pa kenikew siluti su kayi ki te etuvangan te Megbevayà!” ⁹Ne mid-insaan ni Jesus haazà is etew te, “Hentei is ngazan nu?” Ne midtavak dutun haazà is mezaat he mulin-ulin te, “Iyan ngazan ku si Liblibuwen su utew key mezakel is nemenuuk kayi te etew.” ¹⁰Ne haazà is mezaat he mulin-ulin,

mibpenigudu medhangyù sikandin diyà te ki Jesus he kenè din segsega sikandan diyà te meziyù he tanà.

¹¹Ne te uvey zutun duen utew mezakel he minge vavuy he ebpemenuwal ziyà te kelendigan. ¹²Ne sikan is minge mezaat he mulin-ulin, midhangyù dan diyà te ki Jesus te, “Ipehendutun key te minge vavuy wey key mekesuuk diyà te kandan.” ¹³Ne midtugutan ni Jesus sikandan. Ne zutun nemengguwà haazà is minge mezaat he mulin-ulin puun dutun te etew ne midsuuk sikandan duen te minge vavuy. Haazà is minge vavuy, minge zezuwa he libu sikandan, ne nemelelaguy zan petupang dutun te utew mesilid he kelendigan ne mid-agbur zan diyà te ranew zutun ne nengelened dan maamin.

¹⁴Ne zuen minge maama he ebpemen-elima zutun te minge vavuy, ne nemenhendiyè dan te inged is ebpemelelaguy wey ziyà te minge uvey zutun he unayan su ibpesavut dan ke hengkey is nehitavù. Ne hein nezineg haazà te minge etew, ne nemenhendiyè dan te ki Jesus su ed-ahaan dan ke hengkey is neulaula. ¹⁵Ne hein nemekeuma zan, neehè dan kes midsuukan te edliblibuwen he minge mezaat he mulin-ulin. Neehè dan dutun he midsul-ub en te ugelingen ne hustu en is ked-isip-isip din ne tenged dutun utew zan en nengeinuinu. ¹⁶Ne is minge etew he zutun he zaan, midtutul zan dutun te minge etew is neulaula zutun te midsuukan te minge mezaat he mulin-ulin wey is neulaula zuen te minge vavuy. ¹⁷Ne haazà is minge etew, midhengyuan dan si Jesus he med-awè en dutun te minge inged dan.

¹⁸Ne hein ed-untud en si Jesus duen te avang, sikan is etew he neulian te kedsuuki kandin te minge mezaat he mulin-ulin, midhangyù sikandin he eduma ki Jesus. ¹⁹Iyan, wazà medtugut si Jesus he meduma kandin haazà is etew, kekenà, migkegiyan din te, “Ulì ke en ne tudtula nu te kezuzumahi nu is utew zekelà he utew meupiya he midhimu te Nengazen diyà te kenikew wey is hizu zin kenikew.” ²⁰Ne zutun migenat haazà is etew, ne midtukid din is minge inged diyà te prubinsya he Dikepulis, ne mibpenudtul zin is langun he meupiya he midhimu ni Jesus diyà te kandin. Ne nengeinuinu is langun he minge etew zutun.

Is Minatey he Vatà Wey kes Bahi he Zeruwanen

(Marcos 5:21-43; Mateo 9:18-26; Lucas 8:40-56)

²¹Ne midlayun ensi Jesus he ed-untud te avang. Ne hein nekezunggù dan nengeamur-amur zutun te veyvey is utew mezakel he minge etew he mid-uvey zan diyà te kandin. ²²Ne zutun nekeuma zaan is etew he egngezanan ki Hayru. Pengulu si Hayru te sevaha he simbahan te minge Hudiyu. Ne hein neehè din si Jesus ne mid-uvey sikandin diyà te kandin ne midluhud diyà te etuvangan din. ²³Ne midhengyuan din si Jesus te, “Is anak ku he vahi he edragarage en, ne edluwàluwè en te gehinawa.

Edhengyuan ku sikew he hendiyè ka te valey ku wey nu penemsama wey meulii ne meuyag.” ²⁴Ne midumahan sikandin ni Jesus. Ne zutun te ziyè dan te zalan egkengelipitlipit dan en su mezakel is nemenduma kandin he menge etew.

²⁵Ne zuen dutun bahi he utew en nerasey su midsepulù en wey zezuwa he tuig is kegkevusbusi kandin ne kenà ed-engked. ²⁶Ne haazà is daru zin, ne mezakel en he ebpmenambar is midtambar zutun ne naamin en is selapi din he insuhul zin te ebpmenambar kandin, iyan, nasi dà sikandin egkeurak kada edtembari. ²⁷Nezineg dutun te vahi is tudtul mehitenged ki Jesus ne mibpenlietliet en daan sikandin dutun te mezakel he menge etew is edtegel ed-uvey ziyà te egkeiniyugan ni Jesus su wey mekegawed te vā dà kumbalà ni Jesus. ²⁸Su iyan diyà te gehinawa zin is: “Minsan ke mekegawed e zà te kumbalè din ne egkeawè en heini is daru ku.” ²⁹Ne te negewezan din dutun is kumbalà ni Jesus, ne mid-engked haazà is kegkevusbusi kandin ne netuenan din dutun he haazà is egezamen din, ne naawè en diyà te kandin. ³⁰Ne si Jesus, netuenan din dutun he zuen neulaula te gehem din ne midteren is ebpenlangulangu zutun te mezakel he menge etew is mid-insà te, “Hentei is migawed te kumbalè ku?” ³¹Ne migkagi is menge sumusundan din te, “Es, mezakel utew he menge etew is ebpenlietliet diyan te kenikew ne maan is ibpenginginsè nu pa maan ke hentei is migawed te kumbalè nu?” ³²Ne zutun, ebpenlenglenguwen ni Jesus ke hentei is nekegawed dutun te kumbalè din. ³³Ne haazà is bahi, utew nahandek su netuenan din en ke hengkey is nehitavù diyà te kandin dutun te kegewezi zin te kumbalà ni Jesus. Ne mid-uvayan din si Jesus te egkerkeren ne midluhud diyà te etuvangan din ne midseysey zin is langun mehitenged dutun te zaru zin. ³⁴Ne zutun, migkagi si Jesus te, “Bayi, umba neulian ka te zaru nu su midsarig ka kedì. Ulì ke en ne mebmelinawen is kebpekesavuk nu ne kenè ke en maan mezeruwi.”

³⁵Ne te kemulu pa si Jesus egkagi zutun ne zuen nemekeuma he ebpuun diyà te valey ni Hayru. Ne migkagi zan diyà te ki Hayru te, “Kenè nu en bigbigata te eduma pa maan si Jesus su kenè niw en egkesepenan is gehinawa zuen te anak nu.” ³⁶Iyan, si Jesus, wazè din itetenged haazà is migkagi te menge etew, kekenà, migkagi ziyà te ki Hayru te, “Kenè ka meseeng, kekenà, sarig ke zà kediey.” ³⁷Ne zutun iyan dà impelaus ni Jesus he eduma kandan ki Hayru, si Pedro, si Santiago, wey si Juan he suled ni Santiago. ³⁸Ne hein nekeuma zan en dutun te valey ni Hayru, ne naahà ni Jesus dutun he egkengegisaweg is menge etew, ne nezineg din is ebpmenlelendag wey ebpmeninegew. ³⁹Ne midseled ensi Jesus dutun te valey ne migkegiyan din sikandan te, “Maan is egkengegisaweg kew? Maan is ebpmeninegew kew? Wazà mebpatey heeyan is batà, kekenà, midlipezeng!” ⁴⁰Ne te kegkezinega zan dutun te migkagi ni Jesus

ne vâ dan dà mid-engiti sikandin. Ne zutun impaawâ ni Jesus is menge etew zutun te valey. Iyan dà wazè din ipaawâ is amey wey iney zutun te vatâ wey is tetelu he menge sumusundan din. Ne miduma zin sikandan dutun te mibperey-asan te vatâ. ⁴¹Ne hein dutun dan en, migewezan ni Jesus is belad dutun te vatâ ne ke sikandin te, “Telita kumi,” he ke vâ dà egkegiya te, “Bayi, enew kad!” ⁴²Ne mid-enew haazâ is batâ ne segugunâ midhiphipanew. Menge sepulû en wey zezuwa is penuigen dutun te vatâ. Uteu nengeinuinu is iney wey amey zutun te vatâ. ⁴³Ne mibeleuzan sikandan ni Jesus he kenè dan penudtula ke hengkey is neulaula. Ne migkegiyan din daan sikandan he ipekaan dan haazâ is anak dan.

Si Jesus Diyâ te Neserit

(Marcos 6:1-6; Mateo 13:53-58; Lucas 4:16-30)

6 ¹Ne mid-awâ si Jesus dutun te inged ne mid-ulî diyâ te inged din, diyâ te Neserit. Ne nemenduma kandin is menge sumusundan din. ^{2,3}Ne zutun te andew he Sebadu he iyan mahal he Andew te Kedhimeley, mibpenurû ni Jesus is menge etew ziyâ te seled te simbahan te menge Hudiyu. Mezakel he menge etew is nengetigum dutun, ne utew zan nengeinuinu is ebpememineg ki Jesus. Ke sikandan te, “Iyan sikandin sikan is pandey. Is iney zin, ne si Maria ne menge suled din ensi Santiago, si Jose, si Hudas, wey si Simon. Is menge etevey zin, ne kayi zâ daan te inged tew. Maan is metau sikandin? Hendei zin buwa mekuwa is ketau zin? Maan is ebpekehimu sikandin te menge egkein-inuwan?” Ne zutun, wazè dan dewata is ibpenurû ni Jesus. ⁴Ne zutun, migkagi si Jesus diyâ te kandan te, “Is ebpeneuven te Megbevayâ, kenâ sikandin edtehuzen te menge kezuzumahi zin wey te menge zuma he etew zuen te keugelingen din he inged, iyan, diyâ te zuma he menge inged edtehuzen mulâ sikandin,” ke sikandin. ⁵Umba, wazâ egkein-inuwan he ingkepaahâ ni Jesus dutun he inged. Pira zâ dutun he egkengezeruwan is midepenetan din te velad din ne nengeulian sikandan. ⁶Ne utew neinuinu si Jesus su wazâ medtuu kandin is menge etew zutun he inged.

Ne zutun midtukid ni Jesus te ebpenurû is menge siringan he inged dutun.

Is Telaan ni Jesus te Menge Sumusundan Din

(Marcos 6:7-13; Mateo 10:5-15; Lucas 9:1-6)

⁷Ne midtigum din sikan is sepulû wey zezuwa he menge sumusundan din su ibpehipanew zin. Mibpemahinbahin din sikandan te tigduwazuwa. Ne mibpemegayan din daan sikandan te gehem te kebpeguwâ te mezaat he mulin-ulin. ⁸Ne midteleenan din sikandan he ke edhipanew zan, iyan dan dà uwita is tuked dan ne kenè dan med-uwit te keenen, kemuyut, wey minsan selapî. ⁹Idtugut kandan is kedsesepatus, iyan,

kenè dan med-uwit te ed-ilisan dan he ugelingen. ¹⁰Ne ke si Jesus diyà te kandan te, “Emun ebpekeuma kew ziyà te sengeinged kinahanglan he is egkepemenihkan niw he valey ne zutun kew zà uliuli taman te ked-awè niw zutun. ¹¹Ne ke zuen inged he kenè kew zuen igalewgalew wey kenè dan ebpeminegen is ibpesavut niw, ne tektaka niw is eliyavuk diyà te menge paa niw he iyan laguy he edsilutan sikandan te Megbevayà.” ¹²Ne zutun, nenhipanew haazà is menge sumusundan ni Jesus ne impesavut dan he kinahanglan he iniyugi te menge etew is memezaat he ulaula. ¹³Ne mezakel is menge mezaat he mulin-ulin he ebpenlalung te menge etew he impemaawè dan ne mezakel zaan is egkengezeruwan he mibpenheplasan dan te lana ne nengeulian.

Is Kebpatey ni Juan Megbebewtismu

(Marcos 6:14-29; Mateo 14:1-12)

¹⁴Ne nezineg ni Hadì Hirudis is tudtul kayi te mid-ulaula eni Jesus su nevantug en si Jesus diyà te minsan hendei zutun. Ne zuen menge etew he migkagi te, “Heini si Jesus, ne iyan si Juan Megbebewtismu he nevanhew umba zuen din gehem wey zin meveeli is menge iring kayi he singyal.” ¹⁵Ne migkagi is duma te, “Iyan si Jesus sikan is ebpeneuven dengan he si Elias.” Ne migkagi is duma pa te, “Ebpeneuven iyan si Jesus he iring te menge tipehuna he ebpeneuven dengan te Megbevayà,” edhenduen dan.

¹⁶Iyan, hein nezineg ni Hadì Hirudis haazà is egkegiyen dan, kunaan din ke nevanhew si Juan, ne ke sikandin te, “Heini si Jesus, ne iyan ded si Juan Megbebewtismu he mibpepungelan ku te ulu ne nevanhew sikandin.” ^{17,18}Ne heini si Hadì Hirudis, iyan hinungdan he ingkepehimetayan din si Juan su migkegiyan sikandin ni Juan he supak te kesuguan is ked-egawa zin te esawa te suled din su si Hadì Hirudis, mid-esawa zin is ipag din he si Hirudias he esawa te suled din he si Felipe. Ne tenged dutun te migkagi ni Juan, impezakep sikandin ni Hirudis ne mibpirisu zin. ¹⁹Ne si Hirudias, nepeukan din si Juan, ne ebpehimetayan din pezem, iyan, wazà itugut ni Hadì Hirudis. ²⁰Ne si Hadì Hirudis, egkehandek sikandin ki Juan su netuenan din he metazeng he etew si Juan he ed-ulinan te Megbevayà. Umba wazè din itugut he mehimetayi. Egkesuatan ni Hirudis te ebpemineg is kebpenurù ni Juan, iyan, ingkeliveg din haazà is penurù.

²¹Asal neuma is kedsilibra te andew te ked-enaka ki Hirudis. Ne zutun naahà human ni Hirudias is paagi wey zin ikepehimetayi si Juan. Midtukud ni Hadì Hirudis is dekelà he keemuran ne mibpemesuguan din is menge punuan wey is menge egalen te menge sundaru wey is menge sepian diyà te prubinsya he Geliliya. ²²Ne sikan is anak he vahi ni Hirudias, midseled dutun te keemuran ne midsayew ne utew

ingkelangan ni Hadì Hirudis wey sikan is ebpemengaan duma kandin. Ne tenged dutun migkegiyan sikandin ni Hadì Hirudis te, “Buyù ka kedì te minsan hengkey ne ibegey ku kenikew.” ²³Ne utew mezesen is pesarig ni Hadì Hirudis dutun te midsayew su ke sikandin te, “Minsan hengkey is ebuyuen nu kedì, minsan ke liwazè pa kayi te ginhedian ku ne ibegey ku.” ²⁴Ne zutun miguwà haazà is raga ne midhendiyà te iney zin ne mid-insà ke hengkey is meupiya he ebuyuen din. Ne midtavak haazà is iney zin te, “Iyan nu vuyua is ulu ni Juan Megbebewtismu.” ²⁵Ne zutun migaanggaan en maan medseled haazà is raga ne migkegiyan din si Hadì Hirudis te, “Iyan ebuyuen ku guntaan dà is ivegey nu kediey is ulu ni Juan Megbebewtismu he id-ahuk diyà te pinggan.” ²⁶Ne zutun utew neseeng si Hirudis, iyan, tenged te utew mezesen is pesarig din he nezineg daan haazà is pesarig din dutun te menge etew he nemenelavuk dutun te keemuran, ne ingkevensahi zin ke kenè din edtumanen haazà is pesarig din. ²⁷Ne midsugù din dutun is sundaru he ipehendiyà te pirisuwan su ibepungelan din si Juan Megbebewtismu. Ne midhendiyà haazà is sundaru ne mibpungelan din te ulu si Juan Megbebewtismu. ²⁸Ne is ulu ni Juan, in-ahuk te pinggan ne mid-uwit dutun te sundaru ne imbegey zin dutun te raga. Ne haazà is raga, imbegey zin haazà is ulu ziyà te iney zin. ²⁹Ne hein netuenan heini te menge sumusundan ni Juan, midhendutun dan te pirisuwan. Ne migkuwa zan is lawa ni Juan ne inleveng dan.

Is Kebpekeena te Lelima he Libu he Menge Etew

(Marcos 6:30-44; Mateo 14:13-21; Lucas 9:10-17; Juan 6:1-13)

³⁰Ne is menge epustul ni Jesus, nekelikù dan diyà te kandin, ne midtudtul zan diyà te kandin is langun he mid-ulaula zan wey impemenurù dan. ³¹Ne migkegiyan ni Jesus sikandan te, “Edhendiyè kiw zè pa te tanà he wazà duen etew su wey kiw mekehimeley,” ke sikandin. Umba migkagi ni Jesus heini su mezakel utew he menge etew is ebpemekedtetelevukè dà diyà te kandin. Ne wazà timpu zan minsan te kegkaan. ³²Ne zutun mid-untud dan te avang su edhendiyè dan te tanà he wazà duen menge etew.

³³Ne hein egenat dan en naahà sikandan te mezakel he menge etew ne netuenan dutun te menge etew he iyan haazà ensi Jesus. Ne zutun, haazà is menge etew, nemelelaguy zan he ebpuun te langun he menge inged dutun, ne nemeyvey zan he edhuna ziyà te egketendangan dutun te avang he mid-untuzan eni Jesus. ³⁴Ne hein migaun si Jesus puun dutun te avang ne neehè din he nengeamur-amur zutun is utew mezakel he menge etew. Ne nehizuwan din sikandan su henduen be sikandan te menge ayam he kerehidu he wazà ed-elima kandan. Utew zan mekehizuhizu. Umba, mezakel is impenurù din kandan dutun. ³⁵Ne

hein mahapun en dutun mid-uvayan sikandin te minge sumusundan din ne ke sikandan te, “Mahapun en utew ne wazà minge inged kayi te uvey tew. ³⁶Ipegenat nu en is minge etew wey zan mekehendiyà te minge inged wey minge unayan wey zan mekepemasa te egkekaan dan.” ³⁷Iyan, migkagi si Jesus te, “Iyan kew mebegey te egkekaan dan.” “Esi!” ke sikandan, “minsan pa ke utew zekelà is selapì tew, minsan dezuwa he gatus he vuuk he selapì he dinaryu ne kenè pa ereg he ibpemasa te egkekaan kayi te utew mezakel he minge etew.” ³⁸Ne migkagi zutun si Jesus te, “Susiya niw ke sengemenu is naazen tew he egkekaan.” Ne hein nesusi zan en, ke sikandan diyà te ki Jesus te, “Lelima zà he vuuk he supas wey zezuwa he vuuk he pait.”

³⁹Ne zutun impepundukpunduk ni Jesus is minge etew he impemepinuu zin dutun te perekpek. ⁴⁰Ne nememinuu zan ne tignenggatus wey kelimahan he etew is kada punduk. ⁴¹Ne migkuwa zutun ni Jesus haazà is lelima he supas wey haazà is dezuwa he pait ne midlingahà diyà te langit ne mibpeselematan din te Megbevayà. Ne mibpenevitevì din is lelima he supas, *ne minsan pa zutun kenà egkeamin haazà is edtevien din. Ne imbegey zin diyà te minge sumusundan din haazà is nengetevì wey zan ikepemegey zutun te minge etew. Ne iring ded daan haazà is kebpenebtevia zin dutun te zezuwa he pait.* ⁴²Ne mibpemengaan dan dutun ne pudu zan nengehantey. ⁴³Ne haazà is egkeenen, nesemaan pa te sepulù wey zezuwa he vinevey is nehimes te minge sumusundan din he minge tevì te supas wey pait. ⁴⁴Ne lelima he libu is kezakel zutun te minge maama zà he nemekekaan te minge supas *ne wazà iragkes te ebilang is minge vahi wey minge vatà.*

Is kedhipanew ni Jesus Duen te Ranew
(Marcos 6:45-52; Mateo 14:22-33; Juan 6:16-21)

⁴⁵Ne impemeuntud ni Jesus te avang is minge sumusundan din wey zan mekehuna mekelayun pehendiyà te zehipag dutun te ranew pehendiyà te inged he Bitsayda su ibpemeulì din pa haazà is mezakel he minge etew. ⁴⁶Ne hein nekehipanew en haazà is minge etew, midtekezeg si Jesus diyà te vuvungan su mid-ampù. ⁴⁷Ne hein mezukilem en dutun, haazà is nemen-untud te avang, meziyù dan en su ziyè dan en te lawed dutun te ranew, ne si Jesus, kemulu pa sikandin dutun te vuvungan te sebsevaha zin. ⁴⁸Ne netuenan ni Jesus he utew edlised haazà is minge sumusundan din he ebpemegsey su egkesinugung dan is mevendes he keramag. Ne hein megaan egkepawà, midtelukun si Jesus kandan is edhipanew ziyà te wahig. Henduen be te edhuna sikandin kandan, iyan, ⁴⁹hein naahà sikandin dutun te minge sumusundan din is edhipanew ziyà te wahig, nekehuyab is gehinawa zan su kunaan dan ke gimukud sikandin. Ne nemen-eerang sikandan ⁵⁰su pudu zan is nemekeahà kandin, utew nengehandek. Ne zutun

migkagi ziyà te kandan si Jesus te, “Sarig kew; kenè kew mahandek su iyan a heini,” ke sikandin. ⁵¹Ne midruran sikandin dutun te avang dan ne mid-engked haazà is keramag. Ne utew zan si Jesus ingkeinuinu. ⁵²Su minsan neehè dan haazà is egkein-inuwan he mibeelan ni Jesus dutun te supas wey pait, wazè dan pa mesavut ke hentei sikandin su mezesen is isip dan.

Is Kebewii te Menge Etew Ziyà te Giniserit
(*Marcos 6:53-56; Mateo 14:34-36*)

⁵³Ne hein nekeuma zan diyà layun dutun te ranew nekezunggù dan diyà te inged he Giniserit. ⁵⁴Ne migaun dan puun dutun te avang ne zutun nekilala si Jesus te menge meginged dutun. ⁵⁵Ne migègeenan dan ipemetukew is egkengezeruwan diyà te menge siringan he inged. Ne minsan hendei zan egkezineg he zutun si Jesus, ne ebintingen dan is duen din daru su ed-uwiten dan diyà te kandin. ⁵⁶Ne minsan hendei sikandin ebpevayà, ke ziyè be te menge inged wey menge unayan be, ne zutun gihapun egkeuma zin is egkengezeruwan he ed-uwiten diyà te kandin. Idsavuk dan is egkengezeruwan diyà te lugar he ebelegyaan ne edhengyuan dan si Jesus he minsan bà dà mekegawed haazà is egkengezeruwan te minsan sidsid dà te kumbalè din. Ne minsan hentei he nekegawed te kumbalà ni Jesus dutun, ne neulian.

Is Tulumanen te Menge Perisiyu
(*Marcos 7:1-13; Mateo 15:1-9*)

7 ¹Ne sevaha he timpu nemekeuma ziyà te ki Jesus is menge Perisiyu wey menge menunudlù te kesuguan he ebpuun sikandan diyà te Hiruselim. ²Neehè dan he is duma zutun te menge sumusundan ni Jesus, edsupaken dan is tuluuwen te menge Perisiyu su ebpemengaan dan he wazè dan mebpenlùlù te menge velad dan.

³Su is menge Hudiyu, lavew en is menge Perisiyu, kenè dan egkaan ke kenè dan egkelùluan is menge velad dan su iyan haazà betasan he imbilinbilin te menge gin-epuan dan dengan. ⁴Ne emun ebpekeulì dan he ebpuun te mirkadu ne ebpirikan dan edhunai te wahig is lawa zan ne human dan egkaan. Ne mezakel pa is neleyaman dan he tuluuwen iring te kebpenlùlù te menge inumà wey menge kuzen wey menge edtengelan he galang.

⁵Ne tenged kayi haazà is menge Perisiyu wey menge menunudlù te kesuguan, mid-insaan dan si Jesus te, “Maan is midlipatan en te menge sumusundan nu is imbilinbilin he tuluuwen te gin-epuan tew su maan is tekew zan en egkaan ne kenè dan ebpenlùlù?” ⁶Ne midtavak si Jesus te, “Sikiyu is akal zà is kedtuu niw te Megbevayà, utew hustu is Lalag te Megbevayà he insurat te tipehuna he ebpeneuven he si Esaias. Netagnè kew zin su ke sikandin te,

‘Heini is minge etew,’ egkagi is Megbevayà,
 ‘egkagi zan he edtehuzen e zan,
 iyan, wazà kedtuu he neseled te gehinawa zan.

⁷Wazà pulus te kedsimba zan kedi
 su ibpenurù dan he minge sugù
 ku is kandan dà he ebpeveelan te minge etew.’

⁸Is kesuguan te Megbevayà,” ke si Jesus, “midlipatan niw en, ne iyan niw edtumanen is imbilinbilin he vetasan he midhimuhimu zà te minge etew.”

⁹Ne mid-uman megkagi si Jesus te, “Uteu kew metau te paagi te ked-engkezi niw te insugù te Megbevayà wey niw mepurungi te edtuman is kesuguan he mibeelan te etew. ¹⁰Sikan is Lalag te Megbevayà he insugù kenitew zengan ni Moises, edhenduen te, ‘Tehuza niw is amey niw wey iney niw.’ Ne migkagi zin daan dutun he, ‘Ke zuen edsulà te amey zin wey iney zin, kinahanglan he edhimetayan.’ ¹¹Ne iyan keniyu he ibpenurù is: ke zuen etew he zuen din igketavang te iney zin wey amey zin, edtugutan niw haazà is etew ke egkagi zutun te minge ginikanan din te, ‘kurban’, he ke vā dà egkegiya, ‘Heini is idtavang ku pezem keniyu, kenè ku igkevegey su imbuwis ku ziyà te Megbevayà.’ ¹²Ne pinaagi zutun kenè niw idtugut he edtevangen dutun te etew is amey zin wey iney zin. ¹³Ne pinaagi kayi te nepengevilin niw he minge vetasan, ed-iniyugan niw is Lalag te Megbevayà ne kenà ebpulus diyan te keniyu. Ne mezakel pa is minge ulaula niw he iring kayi.”

Is Ibpekesalà te Etew *(Marcos 7:14-23; Mateo 15:10-20)*

¹⁴Ne impeuman ipeuvey ni Jesus is minge etew ziyà te kandin ne ke sikandin te, “Langun te sikiyu, peminega niw heini is minge lalag ku ne sevuta niw he ¹⁵is egkehimu he igkeepesi te Megbevayà te etew, kenà iyan is keuyagan he ebpekeseled diyà te vèbè din, minsan ke wazà sikandin mebpennlùlù, kekenà, iyan is minge lalag he egawas puun diyà te vèbè din. ¹⁶Is minsan hentei keniyu, sevuta niw heini is minge lalag ku.”

¹⁷Ne hein mid-awà si Jesus dutun te minge etew ne midseled diyà te valey, ne mid-insaan sikandin te minge sumusundan din ke hengkey is kehulugan duen te migkagi zin. ¹⁸Ne ke si Jesus te, “Iring kew ves te minge zuma he etew su maan is wazè niw geina mesavut he is egkekaan te etew, ne kenà egkehimu he igkeepesi kandin te Megbevayà ¹⁹su is egkeenen din, ne ziyè dà ebpekevayà te getek din ne zutun ed-awà diyà te kandin; kenà diyà ebpekevayà te gehinawa zin.” (Ne pinaagi kayi te minge lalag ni Jesus, egketuenan ta he is minsan hengkey he egkekaan, idtugut kenitew he egkeenen tew.) ²⁰⁻²²Ne migkagi si Jesus med-uman te, “Is egkehimu he igkeepesi te Megbevayà te etew ne iyan is egawas

he ebpuun diyà te gehinawa zin. Su ziyà te gehinawa zin ebpuun is memezaat he isip, is kedhilavet te kenè din esawa, kebpenakew, kebpmemunù, kegkesina, kebpesipala, kebpenlimbung, is memahawag he ulaula, kegkeima, kedèdeeti te zengeg te minge zuma zin, kebpelavew zin wey is kedlalunglalung. ²³Heini is memezaat he ulaula, diyà ebpuun te gehinawa te etew ne iyan igkeepesi kandin te Megbevayà.”

Is Kedtuu Zuen te Vahi he Kenà Hudiyu

(Marcos 7:24-30; Mateo 15:21-28)

²⁴Ne mid-awà si Jesus dutun te prubinsya he Geliliya ne midhendiyà te minge inged he uvey te inged he Tiru. Ne te kebpekeuma zin dutun ne mibpemenahik diyà te sevaha he valey. Ne kenè din pezem egkesuatan he metueni te minge etew ke hendei sikandin medateng, iyan, wazà haazà iyan mehitavù is egkesuatan din su segugunà nekeeneb haazà is tudtul te kebpekeuma zin. ²⁵Ne zuen dutun sevaha he vahi he zuen din anak he ragaraga he edlelungen te mezaat he mulin-ulin. Ne hein nezineg din he nekeuma si Jesus ne midhendutun ne midluhud diyà te etuvangan din. ²⁶Ne midhangyù he vewii ni Jesus is anak din he edlelungen te mezaat he mulin-ulin. Ne haazà is bahi, ne kenà Hudiyu su tigPinisya ziyà te prubinsya he Sirya. Is kinegiyan din ne Gerisyahanen. ²⁷Ne migkegiyan sikandin ni Jesus te, “Idhuna ibpekaan is minge vatà su kenà meupiya ke egkuwaan ta is egkeenen te minge vatà ne idsamak te minge asu.” Ne iyan ibpesavut ni Jesus dutun is: edhunaan din te edtavang is minge Hudiyu, ne human is kenà minge Hudiyu. ²⁸Ne migkagi haazà is bahi te, “Benar, Datù, heeyan, iyan, is asu, egkehimu zaan he ebpenelisimen din is egkengeulug he mumu puun dutun te egkeenen te vatà.” ²⁹Ne si Jesus, migkagi ziyà te kandin te, “Geina te iyan heeyan lalag nu, uli ke en su is anak nu, mid-ewaan en sikandin te mezaat he mulin-ulin.” ³⁰Ne hein nekeuma haazà is bahi ziyà te valey zin, neehè din he edhidhizegà haazà is anak din he mid-ewaan en te mezaat he mulin-ulin he edlalung kandin.

Is Kebewii Zuen te Ngulit he Vengel

³¹Ne zutun te ked-ulì ni Jesus, ne ziyà sikandin mebayà te inged he Tiru wey ziyà te prubinsya he Dikepulis, ne human diyà te ranew he Geliliya. ³²Ne zuen minge etew he mid-uwit dan diyà te ki Jesus is etew he vengel wey ngulit pa ke egkagi. Ne midhangyù dan si Jesus he zempaa zin haazà wey meulii. ³³Ne zutun mid-agak ni Jesus haazà is bengel he ngulit su idsivey zin dutun te minge etew ne intiyuk din is tezù din dutun te telinga te vengel ne midhames din te ileb din is tezù din ne indazas din dutun te zilà te etew. ³⁴Ne midlingahà si Jesus diyà te langit ne migegehinawa te mezalem ne ke sikandin te, “Ipata!” he ke vā dà egkegiya, “Mepuwasi!” ³⁵Ne zutundutun nepuwasan is kedineg

dutun te etew ne naawà is kegkevisekeg te zilè din ne metandang en is kegkagi zin. ³⁶Ne zutun migkegiyan ni Jesus is menge etew zutun he kenè dan penudtula haazà is neehè dan he mibeelan din, iyan, nasi wazà meeren is tudtul zan mehitenged dutun te neehè dan. ³⁷Uteu zan haazà ingkeinuinu ne ke sikandan te, “Uteu meupiya is kebeeli zin kayi te langun su edhimuwen din minsan is kenà ebpekezineg he mekezineg ne sikan is kenà ebpekekagi ne ebpekekagi!”

Is Kepekeena te Heepat he Libu he Menge Eteu

(Marcos 8:1-10; Mateo 15:32-39)

8 ¹Ne nepipira pa he menge andew zutun nengeamur-amur en maan diyà te ki Jesus is utew mezakel he menge etew. Ne hein neeminan dan en te lutù, mid-umew ni Jesus is menge sumusundan din, ne ke sikandin te, ²“Kehizu kayi te menge etew su tetelu en he kezukileman is wazè dan medsuwey kenitew ne wazè dan en egkekaan. ³Ne emun ibpeuli ku sikandan te wazè dan mekekaan kela ke luyahi sikandan diyà te zalan, su is duma kandan ne meziyù is ed-ubpaan.” ⁴Ne midtavak haazà is menge sumusundan din te, “Meziyù heini te menge valey. Ne wazè tew egkekuwaan te ibpekaan kayi te utew mezakel he menge etew.” ⁵Ne ke si Jesus te, “Pira he vuuk is supas niw?” Ne ke sikandan te, “Pitu he vuuk.”

⁶Ne migkegiyan ni Jesus haazà is menge etew he mebpememinuu zan diyà te tanà, ne migkuwa zin haazà is pitu he vuuk he supas ne mibpeselematan din te Megbevayà, ne zutun mibpenevitevi din. *Ne minsan pa zutun kenà egkeamin haazà is edtevien din. Ne indata zin dutun te menge sumusundan din wey zan ikepemegey zutun te menge etew.* ⁷Ne zuen daan dutun pira he legas he zeisek he pait ne hein nepeselematan din en insugù din he ipemegey zaan haazà dutun te menge etew. ⁸Ne pudu nengehantey haazà is menge etew he nemekekaan dutun. Ne is nesamà dutun te menge tinevi he supas wey pait, ne pitu he vinevey. ⁹Menge heepat he libu is kezakel zutun te menge etew he nengehantey zutun. ¹⁰Ne impemeuli ni Jesus sikandan. Ne zutun, si Jesus wey is menge sumusundan din, mid-untud dan te avang ne midhendiyè dan te tanà he Delmenuta.

Is Ebpen-ahà te Singyal

(Marcos 8:11-13; Mateo 16:1-4)

¹¹Ne hein nekeuma zan en, midhendiyà te ki Jesus is menge Perisiyu ne mibpekidlewanè dan kandin. Migkegiyan dan sikandin he mebpaaahà sikandin te singyal he egkein-inuwan he tuus he sugù sikandin te Megbevayà. Umba migkagi zan haazà su egezaman dan sikandin. ¹²Ne haazà, inmesakit te gehinawa ni Jesus ne ke sikandin diyà te kandan

te, “Sikiyu is minge zuma ku he minge Hudiyu, maan is egkinahanglan kew he mekeehè kew te egkein-inuwan he singyal ne human kew edtuu? Benar utew is egkegiyen ku keniyu he wazà singyal he ibpaahà keniyu.”¹³ Ne zutun mid-ewaan eni Jesus haazà is minge etew. Mid-untud dan en maan te avang su edlayun dan dutun te ranew.

Is Ketudluan te Minge Perisiyu Wey is ki Hirudis
(*Marcos 8:14-21; Mateo 16:5-12*)

¹⁴ Sengevuuk dà he supas is dutun te kandan su nelipat is minge sumusundan din he ed-uwit te supas he egkelutù dan. ¹⁵ Ne zutun duen sempità he impezineg kandan ni Jesus. Ibpesavut din he likayi zan is minge mezaat he vetasan te minge etew. Ke sikandin te, “Andam kew wey niw melikayi is tapey te minge Perisiyu wey is tapey te minge sakup ni Hadì Hirudis.” ¹⁶ Wazè dan mesavut he kenà iyan is tapey te supas egkegiyen din ne mibpelelelagè dan te, “Iyan ingkegiya zin kayi su wazè kiw mekeuwit te lutù tew he supas.” ¹⁷ Ne netuenan ni Jesus ke hengkey is diyà te isip dan ne ke sikandin te, “Maan is egkesemukan kew te wazè kew mekeuwit te supas? Kenè kew pe bes ebpekesavut? Henduen te wazè niw isip. ¹⁸ Duen niw mata, iyan, henduen be te kenè kew ebpekeahà. Duen niw telinga ne henduen be te kenè kew ebpekezineg. Nengelipatan niw ve sikan is mid-ulaula ku? ¹⁹ Su hein mibpenevitevi ku sikan is lelima he vuuk he supas he impekaan duen te lelima he libu he minge maama, pira he vinevey is nengepenù niw te nengesamà he minge tinevi he supas?” Ne zutun midtavak dan te, “Sepulù wey zezuwa.” ²⁰ Ne mid-uman med-insà si Jesus te, “Ne hein mibpenevitevi ku sikan is pitu he vuuk he supas he impekaan duen te heepat he libu he minge etew, pira he vinevey zutun is nengepenù niw te nengesamà he tinevi?” Ne midtavak dan te, “Pitu he vinevey.” ²¹ Ne migkagi si Jesus diyà te kandan te, “Ne egkesavut niw human buwa he kenà supas is igkeseeng tew.”

Is Kebewii Zuen te Lakap Diyà te Bitsayda

²² Ne nekeuma zan diyà te inged he Bitsayda ne zuen minge etew zutun he mid-uwit dan diyà te ki Jesus is sevaha he lakap. Ne midhengyuan dan si Jesus he zempaa zin haazà wey meulii. ²³ Ne mid-agak ni Jesus haazà is lakap pehendiyà te gawas dutun te inged. Ne mid-ilevan ni Jesus is minge mata zutun te lakap ne midampè din, ne mid-insaan din ke zuen be egkeehè din. ²⁴ Ne nenlangulangu haazà is lakap ne ke sikandin te, “Egkeehè ku is minge etew he henduen be te minge kayu he ebpenhiphanew.” ²⁵ Ne zutun mid-umanan Dempaa ni Jesus haazà is mata zutun te lakap. Ne zutun mibpurung mebpenlangulangu haazà is lakap ne egkemelmelegan din en is minge etew te ed-ahà su mibmeupiyen en is mata zin. ²⁶ Ne migkegiyan ni Jesus haazà is etew he medtandang en med-ulì ne kenè en mebpenuluytuluy pa maan minsan dutun te inged.

Is Migkagi ni Pedro Mehitenged ki Jesus
(Marcos 8:27-30; Mateo 16:13-20; Lucas 9:18-21)

²⁷Ne zutun, midlaus si Jesus wey is minge sumusundan din su edhendiyè dan te minge inged he ziyà te uvey te inged he Sisarya Pilipus. Ne zutun te ziyè dan te zalan mid-insaan din is minge sumusundan din te, “Hentei e kun sumalà te ked-isipa kediey te minge etew?” ²⁸Ne midtavak dan te, “Duen egkagi he iyan ka si Juan Megbebewtismu he nevanhew ne zuen daan egkagi he iyan ka sikan is tipehuna he si Elias, ne egkagi is duma pa he sevaha ka zuen te minge tipehuna zengan he ebpeneuven te Megbevayà.” ²⁹Ne zutun mid-insaan din sikandan te, “Ne sikiyu zaan, hentei e man sumalà is ked-isipa niw kediey?” Ne zutun midtavak si Pedro te, “Iyan ka sikan is mibpili te Megbevayà he ibpahadi din te menusiya.” ³⁰Ne zutun migkegiyan sikandan ni Jesus he kenè dan tudtula haazà diyà te minsan hentei.

Is Kegkegiya ni Jesus te Kemetayen Din
(Marcos 8:31-38; Mateo 16:21-28; Lucas 9:22-27)

³¹Ne zutun impesavut ni Jesus te minge sumusundan din is imbanglis kandin. Ke sikandin te, “Siak is Kakey te Menusiya, mezakel is minge kemeresayan he ibpaantus kediey. Edsumpeliten a te minge ebmegurangan te minge Hudiyu wey te minge punuan he memumuhaw wey te minge menunudlù te kesuguan. Edhimetayan e zan ne seled te tetelu he andew zutun egkevanhew a.” ³²Ne mibpurungan din seysaya is egkeulaula zin. Ne hein nezineg ni Pedro haazà, ne insivey zin si Jesus ne migkegiyan din te kenà haazà egkehimu is egkeulaula ni Jesus. ³³Ne zutun midsineruwan ni Jesus haazà is minge sumusundan din ne migkegiyan din si Pedro te, “Sikew is ed-iring ki Setanas, awè ka zini te kediey, su wazà diyà te isip nu is egkesuatan te Megbevayà, kekenà, iyan diyà te isip nu is egkesuatan te etew!”

³⁴Ne zutun impeuvey ni Jesus diyà te kandin is minge etew wey minge sumusundan din. Ne ke sikandin te, “Ke zuen egkesuat he edsundan kedì, kinahanglan he iawè din diyà te isip din is kandin he egkesuatan he minge ulaula, ne tianga zin is krus din, *he ke và dà egkegiya, kinahanglan he edtumanen din is minge sugù ku minsan pa ke iyan ibpatey zin. Ne human ebpekesunud kedì.*” ³⁵Su ke zuen etew he egkenugunan din is untung din, ebpatey gihapun. Iyan, ke zuen etew he minsan ibpatey zin pa ne edsunud kedì wey edsangyew te Meupiya he Tudtulanen, id-ulì te Megbevayà diyà te kandin is untung din ne kenè en sikandin ebpatey te wazà pidtemanan. ³⁶Minsan ke maangkén pa te etew is tivuuk he kelibutan, wazà pulus diyà te kandin ke kenà sikandin ebgayan te untung he wazà pidtemanan. ³⁷Su wazà minsan hengkey he

azen he igkeliwè din wey zin maangken is untung he wazà pidtemanan.
³⁸Is minsan hentei he igkeeled e zin wey igkeeled din is ibpenurù ku kayi te timpu he mezakel is menge etew he lalung wey edsumpalit te Megbevayà, siak is Kakey te Menusiyà, igkeeled ku zaan sikandin keuzemà ke edlikù a he edumahan a te menge velinsuguen ku wey edsun-uzan ad te mekegegehem he anlag te Amey ku he Megbevayà.”

9 ¹Ne zutun migkagi si Jesus te, “Tentenuzi niw heini: duen menge zuma tew kayi he kenà ebpatay taman dutun te timpu he ibpaahà te Megbevayà is kedhadì din he utew zekelà is gehem din te kebayaàbayà te menusiyà.”

Is Kegkahalin ni Jesus

(Marcos 9:2-13; Mateo 17:1-13; Lucas 9:28-36)

²Neiwas is heenem dutun he andew, ne miduma ni Jesus ensi Pedro, si Santiago, wey si Juan ne midtekezeg dan te utew metikang he vuvungan he iyan dan dà. Ne zutun te kedtengtengi zan ki Jesus netik-ew mahalin is dagwey zin. ³Is kumbalè din ne henduen te ebpenerètà he vulan su utew meputì. Wazà meputì he pinìpian dini te kelibutan he ebpekeiring dutun. ⁴Ne zutun netik-ew zan daan maahà si Elias wey si Moises he ebpekidlalag ki Jesus. ⁵Ne zutun migkagi si Pedro ziyà te ki Jesus te, “Uteu meupiya te zini key. Ebeelan dey is tetelu he lawig; sevaha is kenikew, sevaha zaan is ki Moises, wey sevaha is ki Elias,” ke sikandin. ⁶Uteu zan nengehandek umba wazà metentenuzi ni Pedro ke hengkey haazà is nekagi zin. ⁷Ne neselikuvungan sikandan te gapun ne nezineg dan is midtik-ew megkagi he ebpuun dutun te gapun te, “Iyan heini sikan is Anak ku he utew ku minahal. Peminaga niw is menge lalag din.” ⁸Ne zutun mibpenlangulangu haazà is menge sumusundan, iyan, wazè en dutun egkaahà he zuma he etew su iyan dà si Jesus maan duma zan dutun.

⁹Ne zutun te kedtupang dan, mibeleuzan sikandan ni Jesus te, “Taman te kenè e pa ebendahawen is Kakey te Menusiyà, kenè niw penudtula sikan is neulaula he neehè niw geina.” ¹⁰Ne midtuman dan haazà is lalag kandan ni Jesus, iyan, mibpein-inseey zan is tetelu ke hengkey is ibpesavut ni Jesus te kegkagi zin he ebendahawen sikandin. ¹¹Ne mid-insaan dan si Jesus te, “Maan is egkegiyen te menge menunudlù te kesuguan he edhuna edlepew si Elias, sikan is ebpeneuven dengan ne human sikan is edhadì he mibpilì te Megbevayà?” ¹²Ne midtavak si Jesus te, “Tutuu iyan he edhuna ebpekeuma si Elias su ed-endamen din is langun, iyan, maan is netagnà dengan dutun te ingkesurat he Lalag te Megbevayà he siak is Kakey te Menusiyà, mezakel is memerasey he egkeantus ku ne edsumpeliten a. ¹³Netuman en sikan is kedlepew ni Elias, ne midrasey zan en sikandin sumalà is egkesuatan dan he ed-ul-

ulahan diyà te kandin su iyan heini tagnà he egkevasa ta ziyà te insurat he Lalag te Megbevayà.”

Is Kebugawa te Mevurut he Mezaat he Mulin-ulin

(Marcos 9:14-29; Mateo 17:14-21; Lucas 9:37-43)

¹⁴Ne hein neumahan eni Jesus sikan is duma he minge sumusundan din, neehè dan he edlingutan te mezakel he minge etew ne ebpekidlewanà kandan is minge menunudlù te kesuguan. ¹⁵Ne hein naahà te minge etew he ebpelingguma si Jesus, utew zan nengeinuinu su wazè dan peebuta haazà is kebpekeuma ni Jesus, ne zutun migaanggaan dan medsinugung diyà te kandin. ¹⁶Ne nenginginsà si Jesus dutun te minge sumusundan din te, “Hengkey is egkelewenaan niw?” ¹⁷Ne midtavak is sevaha zutun te minge mezakel he etew te, “Is anak ku he maama, ne kenà ebpekekagi su edlelungen te mezaat he mulin-ulin, ne mid-uwit ku zini su wey mevewii. ¹⁸Kada kedresaya kandin te mezaat he mulin-ulin ne ebpekelagkut diyà te tanà ne eburvuraan is bèbè din ne ebpekekegetket te minge ngipen din ne egkevidbid sikandin. Ne midhangyù ku is minge sumusundan nu he vewii zan, iyan, kenè dan egkehimu.” ¹⁹Ne zutun migkagi si Jesus te, “Sikiyu is minge etew guntaan, wazè niw iyan kedtuu te Megbevayà. Utew ves egkeuget is kebpekiduma ku keniyu. Utew ves egkeuget is kebpekeantus ku keniyu ne human kew edtuu. Ihengkayi niw heeyan is batà.” ²⁰Ne zutun, mid-uwit dan diyà te ki Jesus haazà is batà. Ne sikan is mezaat he mulin-ulin, hein neehè din dutun si Jesus, midhimu zin he mevidbid haazà is batà ne nekelagkut diyà te tanà ne nelilidlilid ne miburàburà is bèbè din. ²¹Ne zutun mid-insaan ni Jesus is amey zutun te vatà te, “Sengemenu en kelugayad is kegezama zin kenian?” Ne midtavak haazà is amey zutun te vatà te, “Puun pa te zeisey pa sikandin he vatà. ²²Su is mezaat he mulin-ulin, layun din edhimuwa he mekeagbur ziyà te hapuy wey ziyà te wahig su edhimetayan din. Ne emun duen egkehimu nu, ne ikehizu key kenikew ne iawè nu ziyà te kandin heeyan is egezamen din.” ²³Ne midtavak si Jesus te, “Maan is id-insè nu ke zuen egkehimu ku? Ibegey te Megbevayà is minsan hengkey he ebuyuen te etew he zuen din kedtuu te Megbevayà.” ²⁴Ne zutun, midhabet megkagi haazà is amey zutun te vatà te, “Edtuu a, iyan, deisek pa; hegeta nu pa is kedtuu ku!”

²⁵Ne naahà ni Jesus he ed-iseg ebmezakel is minge etew zutun, su zuen mezakel he ebpemelelaguy pehendutun, ne migkegiyan din haazà is mezaat he mulin-ulin te, “Sikew is mezaat he mulin-ulin he igkevengel wey igkeemew te minge etew, awè ka kenian te edlelungen nu he vatà. Ne kenè ke en medlikù diyà te kandin!” ²⁶Ne zutun, haazà is mezaat he mulin-ulin, impekulahì din haazà is batà ne midhimu zin he mevidvid ne mid-awè en diyà te kandin. Ne haazà is batà, ne henduen be te minatey

su kenè en edwaleng, ne egkagi is minge etew zutun te, “Minatey en.”
²⁷Iyan, migewezan sikandin ni Jesus diyà te velad ne impeenew zin ne zutun midhitindeg haazà is batà.

²⁸Ne hein nekeuli ensi Jesus diyà te valey he midetengan dan ne wazà dutun duma he etew, kekenà, iyan dan dà, ne mid-insaan sikandin te minge sumusundan din te, “Maan is wazè dey meulii sikan is batà he edlelungen te mezaat he mulin-ulin?” ²⁹Ne midtavak si Jesus te, “Is iring duen he mezaat he mulin-ulin, ne kenà igkepaawà ke kenà pinaagi zà te ked-ampù su wazà duma he paagi.”

Is Ikezuwa he Kegkegiya ni Jesus te Kemetayan Din

(Marcos 9:30-32; Mateo 17:22,23; Lucas 9:44,45)

³⁰Ne zutun mid-awè dan dutun ne midlaus dan ne ziyè dan mebayà te prubinsya he Geliliya. Ne kenà egkesuat si Jesus he metueni te minge etew ke hendei sikandin ³¹su wey kenà sikandin mesemuki is ebpenurù te minge sumusundan din. Ne ke sikandin diyà te kandan te, “Siak is Kakey te Menusiyà, duen timpu he ibpalad a ziyà te minge kuntada ku ne edhimetayan e zan, iyan, seled te tetelu he andew zutun egkevanhew a.” ³²Ne haazà is migkagi ni Jesus, wazà mesavut dutun te minge sumusundan din, ne egkehandek dan daan he ed-insà kandin ke hengkey is ibpesavut din dutun.

Is Lavew Zuen te Minge Sumusundan

(Marcos 9:33-37; Mateo 18:1-5; Lucas 9:46-48)

³³Ne nekeuma ensi Jesus diyà te inged he Kepirnaum ne hein diyè dan en te valey, mid-insaan ni Jesus is minge sumusundan din te, “Hengkey sikan is egkelewenaan niw geina ziyà te zalan?” ³⁴Iyan, wazè dan medtavak su egkeeled dan su iyan egkelewenaan dan ke hentei is lavew kandan te minge sumusundan. ³⁵Ne zutun mibpinuu si Jesus ne impeuvey zin haazà is sepulù wey zezuwa he sumusundan din ne ke sikandin diyà te kandan te, “Is minsan hentei keniyu he egkesuat he mekelavew, kinahanglan he isipa zin he utew minus is pid-etawan din ne ebpevayàbayà sikandin te langun he minge zuma zin.” ³⁶Ne zutun migkuwa ni Jesus is batà ne impeteliwazè din dutun te minge sumusundan din. Ne zutun midsepipi zin haazà is batà. ³⁷Ne migkegiyan din sikandan te, “Is etew he tenged te kedtuu zin kedi, edewaten din ne ebpurungan din is minsan hentei he vatà he iring kayi, ne nezawat e zin en daan. Ne is minsan hentei he edawat kediey, nezawat din en daan is Amey ku he Megbevayà he midsugù kedi.”

Is Kenà Kuntada ki Jesus

(Marcos 9:38-41; Lucas 9:49,50)

³⁸Ne migkagi si Juan diyà te ki Jesus te, “Duen etew he neuma zey he ebewian din is minge etew he edlelungen te mezaat he mulin-ulin.

Ne egemiten din is ngazan nu zutun te kebpemawì din. Ne midawey zey su kenà ebpekiduma kenitew.” ³⁹Ne ke si Jesus te, “Kenè niw zewaya is ed-ulaula te iring dutun su ke zuen etew he egkehimu zin is egkein-inuwan he vaal pinaagi te kegemita zin te ngazan ku, kenà sikandin leledayà egkehimu he kuntada ku. ⁴⁰Su is etew he kenè tew kuntada, ne edtavang kenitew. ⁴¹Uteu venar is egkegiyen ku keniyu he ke zuen etew he ebegayan kew zin te minsan sengetasa zà he wahig ne iyan din ibegayi keniyu is tenged te sumusundan ku sikiyu te mibpili te Megbevayà, kenà egkehimu he kenà sikandin edsuhulan te Megbevayà tenged dutun te mid-ulaula zin.

Is Ebpekeawà te Kedsarig

(Marcos 9:42-48; Mateo 18:6-9; Lucas 17:1,2)

⁴²Iyan, ke zuen minsan hentei he pinaagi kandin egkeawà is kedsarig kediey te minsan sevaha kayi te menge vatà he edtuu kediey, meupiya pa zutun he etew ke inhiket diyà te lieg din is zekelà he gelingan he watu ne in-agbur sikandin diyà te lawed te zagat, *kenà is silut kandin ke pinaagi kandin egkeawà is kedsarig te minsan sevaha kayi te menge vatà.* ⁴³Emun iyan igkeawà te kedsarig nu kedì is belad nu, tempaza nu heini wey itimbag su meupiya pa ke pungkul ka is ebegayan te untung he wazà pidtemanan kenà te zezuwa is belad nu ne idtimbag ka ziyà te Impirnu he zutun kenà egkeevukan is hapuy. ⁴⁴Is menge tagkey zutun, ne wazè dan kemetayen ne kenà egkeevukan is hapuy. ⁴⁵Ne emun iyan igkeawà te kedsarig nu kedì is paa nu, tempaza nu wey itimbag su meupiya pa ke pungkul ka is ebegayan te untung he wazà pidtemanan kenà te zezuwa is paa nu ne idtimbag ka ziyà te Impirnu. ⁴⁶Is menge tagkey zutun, ne wazè dan kemetayen ne kenà egkeevukan is hapuy. ⁴⁷Ne emun iyan igkeawà te kedsarig nu kedì is mata nu, lugita nu wey itimbag su meupiya pa ke sevaha zà is mata nu ke edhedian ka te Megbevayà kenà te zezuwa is mata nu ne idtimbag ka ziyà te Impirnu. ⁴⁸Is menge tagkey zutun, wazè dan kemetayen ne kenà egkeevukan is hapuy.

⁴⁹Umba egkegiyen ku heini su is langun, edlimusan te hapuy. ⁵⁰Ne kenà duen dà taman su meupiya is timus su ibmetaam te egkeenen, iyan, ke egkeawà duen te timus is taam din, wazè en paagi he ebpekelikù pa ebpekeuman is taam din. Ne iring din ded daan kinahanglan he iring te timus is menge ulaula niw *wey kew mehimu he ibmeupiya te menge etew ne kinahanglan he mebmelinawen is kedepitè niw te kada sevaha keniyu.*”

Is Ketudluanan Mehitenged te Kebpeengkeza

(Marcos 10:1-12; Mateo 19:1-12; Lucas 16:18)

10

¹Ne mid-awà si Jesus dutun te inged he Kepirnaum ne midhendiyà te prubinsya he Hudiya. Ne zutun midrapas sikandin te wahig he Hurdan.

Ne utew en maan mezakel is minge etew he nengeamur-amur ziyà te kandin. Ne geina te iyan layun ed-ul-ulahan din is kebpenurù, ne mibpenurù din daan haazà is minge etew. ²Ne zutun, duen minge Perisiyu he mid-uvey ziyà te ki Jesus su ebpengahaan dan is paagi te kedsumbunga kandin. Ke sikandan te, “Idtugut be te kesuguan is ked-engkezi ta te esawa ta?” ³Ne insà daan is intavak ni Jesus dutun, ke sikandin te, “Hengkey man is insugù kenitew ni Moises he egkevasa ta zuen te kesuguan mehitenged te kebpekidsuwey?” ⁴Ne midtavak dan te, “Intugut ni Moises diyà te maama he suwayi zin is esawa zin, asal kinahanglan he ebegayan dutun te maama is esawa zin te kemetuuzan he midsuwayan din.” ⁵Ne ke si Jesus diyà te kandan te, “Umba intugut ni Moises is kedsuwayi niw te esawa niw su geina te edsumpeliten niw is penurù, ⁶iyen, is Megbevayà, dutun te kedlimbaga zin te menusiya, mibeelan din is maama wey vahi. ⁷Umba ed-ewaan te maama is amey zin wey iney zin su ebpekidsevaha te esawa zin. ⁸Ne sikandan is teleesawa, kuwinta kenè en maan dezuwa he etew, kekenà, nesevehe en sikandan. ⁹Ne zutun haazà is dezuwa he etew he midsevaha te Megbevayà, kenè en egkehimu he ebpekedsuwey,” ke si Jesus. ¹⁰Ne is minge sumusundan ni Jesus, hein diyè dan en maan te valey he midetengan dan, in-uman dan iinsà kandin is kebpekidsuwey te esawa. ¹¹Ne ke si Jesus diyà te kandan te, “Ke zuen maama he ebpengesawa te sengevevahi su mid-engkezan din is esawa zin, ebpekesalà sikandin dutun te mid-engkezan din he esawa. ¹²Ne is bahi zaan, ke ebpekidsuwey te esawa zin ne ebpeesawa te sengememaame en, ebpekesalà sikandin dutun te midsuwayan din he esawa zin.”

Si Jesus Wey kes Dezeisey he Menge Vatà
(Marcos 10:13-16; Mateo 19:13-15; Lucas 18:15-17)

¹³Ne zutun, duen minge etew he ebpen-uwit diyà te ki Jesus te minge zezeisey he vatà su ebpezepenetan dan te palad ni Jesus, iyan, midawey haazà te minge sumusundan din. ¹⁴Ne hein netuenan ni Jesus haazà is mid-ulaula te minge sumusundan din, wazè din ikesuat, ne ke sikandin diyà te kandan te, “Ipehendini niw te kediey heeyan is minge vatà ne kenè niw zewaya su is etew he zuen din kedsarig he iring te kedsarig te vatà ne iyan ebpekepahadi te Megbevayà. ¹⁵Benar is egkegiyen ku keniya he ke zuen etew he kenà iring is kedsarig din te Megbevayà te kedsarig te zeisey he vatà, ne kenà egkehedian haazà is etew te Megbevayà.” ¹⁶Ne zutun midsekepu zin haazà is minge vatà ne mibpendepenetan din te palad din is minge purù dan ne midtuvazan din sikandan.

Sikan is Sepian he Etw
(Marcos 10:17-31; Mateo 19:16-30; Lucas 18:18-30)

¹⁷Ne zutun te edlaus en edhipanew ensi Jesus, nekesaut kandan is sevaha he maama ne midluhud haazà diyà te etuvangan ni Jesus. Ne ke

sikandin te, “He Menunudlù, utew meupiya is minge ulaula nu. Hengkey is ed-ul-ulahan ku wey a mevegayi te untung he wazà pidteman?”

¹⁸Ne midtavak si Jesus te, “Maan is egkagi ka he meupiya is ulaula ku te sebsevaha zà is meupiya is minge ulaula zin ne iyan is Megbevayà.

¹⁹Netuenan nu en sikan is minge sugù te Megbevayà he imbilinbilin kenitew he iyan is: kenè ka mebunù; kenè nu selselai is esawa nu; kenè ka mebpenakew; kenè ka medtarùtarù diyà te hukmanan; kenè ka medlimbung; ne tehuza nu is amey nu wey iney nu.”

²⁰Ne midtavak haazà is maama ziyà te ki Jesus te, “Menunudlù, is langun kenian, mibenteyanan ku ne wazè ku mesupak puun pa te vatè e pa.”

²¹Ne si Jesus, midtengtengan din haazà is etew su ingkehizu zin ne ke sikandin te, “Duen nu pa kurang; iyan is: uli ka ne ivelegyè nu is langun he azen nu, ne is halin, ipemegey nu ziyà te egkengeayuyu ne edsepian ka ziyà te langit. Ne ke egkeipus nu heeyan, likù ka zini wey ka mekesundan kediey.”

²²Ne hein nezineg dutun te etew haazà is migkagi ni Jesus, ne utew mibmesakit is gehinawa zin ne mid-awà dutun is utew neseeng su zekelà is ketigeyunan din.

²³Ne zutun mibpenlangulangu si Jesus diyà te minge sumusundan din ne ke sikandin diyà te kandan te, “Uteu meregen te sepian he etew is kebpsakup din te Megbevayà wey mehedii sikandin te Megbevayà,” ke sikandin.

²⁴Ne is minge sumusundan din, hein nezineg dan haazà is migkagi ni Jesus, utew zan ingkeinuinu. Ne mid-uman megkagi si Jesus te, “Uteu meregen te etew is kebpsakup din te Megbevayà wey sikandin mehedii.

²⁵Kenè din egkehimu su melemu pa te langgam he kemilyu is kedseled din diyà te vudsi te ragam kenà te sepian he etew te kebpsakup din te Megbevayà wey sikandin mehedii.”

²⁶Ne hein nezineg haazà te minge sumusundan din, mid-iseg is kegkeinuinu zan. Ne ke sikandan te, “Emun kenà egkehimu te sepian, ne kenè bes egkehimu te minsan hentei is ked-angken te untung he wazà pidteman.”

²⁷Ne zutun midtengtengan sikandan ni Jesus te egkagi te, “Kenà iyan egkehimu te etew, iyan, egkehimu mulà te Megbevayà he ibpaangken din is etew te untung he wazà pidteman su egkehimu zin is langun.”

²⁸Ne zutun migkagi si Pedro te, “Ahaa nu man, mid-ewaan dey en is langun he minge azen dey wey key mekesunud kenikew.”

²⁹Ne migkagi si Jesus te, “Kenè niw lipati he is minsan hentei he mid-ewaan din is baley zin, is minge suled din he vahi wey maama, is iney zin wey amey zin, anak din, wey minge tanè din su edsunud sikandin kediey wey idsangyew zin is Meupiya he Tudtulanen,

³⁰haazà he etew, egkezawat din is kenenggatus edtekepa haazà is mid-ewaan din he minge valey, minge suled din he maama wey vahi, iney zin, minge anak din, wey minge tanà ne liyu zutun ibegey kandin keuzemà is untung he wazà pidteman. Asal te zini pa sikandin te kelibutan, egkesegazan din is memeregen he

pesipala kandin. ³¹Mezakel is menge etew guntaan he henduen be te zekelà is pid-etawan dan, iyan, utew minus is pid-etawan dan keuzemà. Ne mezakel zaan is etew guntaan he utew minus is pid-etawan dan, iyan, keuzemà, dekelà is pid-etawan dan,” ke sikandin.

Is Iketelu he Kegkegiya ni Jesus te Kemetayen Din

(Marcos 10:32-34; Mateo 20:17-19; Lucas 18:31-34)

³²Si Jesus wey is menge sumusundan din, hein diyè dan en te zalan pehendiyà te inged he Hiruselim, midhunahuna si Jesus. Is menge sumusundan din, ne nengeinuinu ne neemukan is gehinawa zan su maan is edhendiyà si Jesus te Hiruselim. Ne zuen daan menge etew he edtinundug ne nengehandek sikandan. Ne zutun migkegiyan ni Jesus is sepulù wey zezuwa he menge sumusundan din he medtapid dan ne impesavut din dutun ke hengkey is egkehitavù kandin. ³³Ke sikandin te, “Netuenan niw he edhendiyè kiw te Hiruselim ne emun ebpekeuma kiw zutun, siak is Kakey te Menusiyà, ibpalad a ziyà te menge punuan he menge memumuhat wey menge menunudlù te kesuguan. Ne egkeuyun dan he ebpehimetayan a ne ibpalad e zan daan diyà te menge etew he kenà menge Hudiyu. ³⁴Ne is menge etew he kenà menge Hudiyu, ed-iringen e zan te velvelayen; ebpengilevan e zan, ne ebugelen e zan ne edhimetayan e zan ne seled te iketelu he andew zutun ebenhawen a te Megbevayà.”

Is Hangyù ni Santiago wey ni Juan

(Marcos 10:35-45; Mateo 20:20-28)

³⁵Ne zutun mid-uvey ziyà te ki Jesus is dezuwa he anak ni Sibidiyu he si Santiago wey si Juan, ne ke sikandan te, “He Menunudlù, duen dey idhangyù diyà te kenikew.” ³⁶Ne ke si Jesus te, “Hengkey is egkesuatan niw?” ³⁷Ne ke sikandan te, “Iyan edhengyuen dey he keuzemà ke ebpinuu ke en diyà te pinuuwè nu te kedhadì, ipepinuu key zaan, is sevaha ziyà te egkekewanan nu ne is sevaha ziyà te egkegivan nu.” ³⁸Ne midtavak si Jesus te, “Wazè niw mesavut ke hengkey is edhengyuen niw. Egkeantus niw ve is merasey he ibpaantus kedì? Ne egketigker niw ve is kemeregenan he ibpetigker kediey?” ³⁹Ne midtavak dan te, “Uya egkeantus dey.” Ne migkagi si Jesus te, “Benar iyan he ibpaantus keniyu is iring te merasey wey is kemeregenan he ibpaantus daan kediey, ⁴⁰nyan, kenà a iyan ebpili ke hentei is ibpepinuu ziyà te zapit te egkekewanan ku wey ziyà te zapit te egkegivan ku su iyan dà ebpekepinuu zutun is etew he midtegenahan te Amey ku he Megbevayà.”

⁴¹Ne hein nezing haazà dutun te sepulù he zuma zan he sumusundan, wazè dan ikesuat haazà is midhimu eni Santiago wey ni Juan. ⁴²Ne tenged dutun mid-umew ni Jesus sikandan langun ne ke sikandin te,

“Netuenan ta he is minge punuan te minge inged, ne utew memevurut. Edatùdatù dà sikandan is layun ebmandar te minge etew. ⁴³Iyan, sikiyu mulà, kenà egkehimu is iring kayi zini te keniyu. Ke zuen sevaha keniyu he egkesuat he mekelavew, kinahanglan he suluguen sikandin te langun he minge zuma zin. ⁴⁴Ne emun duen sevaha keniyu he egkesuat he iyan sikandin metikang te langun keniyu, kinahanglan he mebbekevavà sikandin te langun keniyu. ⁴⁵Su siak is Kakey te Menusiya, kenè ku iyan inhendini te kelibutan is wey a metevangi te menusiya, kekenà, wey a meketavang te menusiya ne wey a zaan mebbehimatey su wey ku mevelukasi is mezakel he minge etew.”

Is Kebewii ki Bertimeo

(*Marcos 10:46-52; Mateo 20:29-34; Lucas 18:35-43*)

⁴⁶Ne nekeuma zan diyà te inged he Hiriku, ne hein ed-awà ensi Jesus wey is minge sumusundan din dutun, utew mezakel is minge etew he nemenduma kandin. Ne zuen lakap dutun he mekelilimus he egngezanan ki Bertimeo he anak ni Timiyu. Ne ebpimpinuu haazà is mekelilimus dutun te kilid te zalan. ⁴⁷Ne hein nezineg din he iyan ensi Jesus he tigNeserit haazà is edsagad, ne mibpekezaging sikandin is ed-umew te, “He Jesus he kevuwazan te hadi dengan he si David, kehizuwi a kenikew!” ⁴⁸Ne midawey haazà is lakap te mezakel he minge etew zutun te, “Engked ka!” Iyan, nasì en ebpekezaging sikandin he egkagi te, “He kevuwazan te hadi dengan he si David, kehizuwi a kenikew!” ⁴⁹Ne zutun te kegkezinaga ni Jesus kayi te ebpengumew, midteren sikandin ne migkagi te, “Ipehendini niw heeyan is etew.” Ne zutun migkegiyan te minge etew haazà is lakap te, “Na, hitindeg kad su ibpehendiyè ke zin.” ⁵⁰Ne zutun midhitindeg sikandin ne midluwas din is divavew he kumbalè din ne midhendiyà te ki Jesus. ⁵¹Ne mid-insaan sikandin ni Jesus te, “Hengkey is egkesuatan nu he ebeelan ku?” Ne midtavak haazà is lakap te, “Iyan egkesuatan ku is mekeahà is minge mata ku.” ⁵²Ne ke si Jesus te, “Is kedsarig nu kediey, iyan igkeulii te minge mata nu. Genat kad.” Ne segugunà nekeahà haazà is minge mata zutun te lakap ne miduma sikandin ki Jesus dutun te hipenawan din.

Is Kedhendiyà ni Jesus te Hiruselim

(*Marcos 11:1-11; Mateo 21:1-11; Lucas 19:28-40; Juan 12:12-19*)

11 ¹Ne hein uvey zan en diyà te inged he Hiruselim su ebpekeuma zan en diyà te inged he Bitpagi wey inged he Bitanya he ziyà te vuvungan he egngezanan te Ulivuwan, midsugù ni Jesus is dezuwa te minge sumusundan din. ²Ke sikandin te, “Hendutun kew te inged he egkeumahan tew ne emun ebpekeuma kew zutun, ne egkeehè niw is intagkes he asnu he nati he wazè pa meuntuzi; hekazi niw ne uwita niw

zini. ³Ne ke zuen ed-insà keniyu ke maan is egkuwaan niw haazà is asnu, kegiyi niw te, ‘Egkinehnglanan heini te egalen tew he si Jesus ne id-ulì dà kan.’ ” ⁴Ne zutun migenat haazà is dezuwa, ne neehè dan haazà is nati he asnu ziyà te kilid te zalan su intagkes diyà te uvey te gemawan te sevaha he valey. ⁵Ne hein edhekazan dan en, duen menge etew zutun he mid-insà kandan te, “Ebmenuwen niw heeyan? Maan is edhekazan niw?” ⁶Ne haazà is dezuwa, midtutul zan is impekagi kandan ni Jesus ne midtugutan sikandan dutun te menge etew. ⁷Ne mid-uwit dan haazà is nati ziyà te ki Jesus ne mibelhenan dan te kumbalè dan ne mid-untud si Jesus. ⁸Ne zutun, is mezakel he menge etew, tenged te zekelà is kedtahud dan ki Jesus, impendempas dan is impenamput dan diyà te ibayà ni Jesus, ne is duma, impendempas dan daan dutun is menge zehunen he rasang he mibpemadtì dan diyà te menge keyuwen. ⁹Mezakel he menge etew is midhuna ki Jesus ne mezakel zaan is ebpemeninundug kandin he ebpemengulahì he nengelihey he egkagi te, “Ebpeselematan tew is Megbevayà! Deliga is nekeuma he midsugù te Nengazen! ¹⁰Deliga is ebpekeuma he hadì he iyan kes ed-ilis duen te hadì he kepuun tew he si David! Deliga is Nengazen!”

¹¹Ne hein nekeume en ensi Jesus diyà te Hiruselim midseled sikandin diyà te lavew he simbahan te menge Hudiyu he egngезanan te Valey te Megbevayà. Ne hein neehè din is langun dutun te seled te simbahan, mid-awà sikandin dutun. Ne geina te mahapun en midhendiyà te inged he Bitanya zuma is menge sumusundan din.

Is Kedrewaki ni Jesus te Kayu he Igrira
(*Marcos 11:12-14; Mateo 21:18,19*)

¹²Ne nepawà dutun te ziyè en ensi Jesus te zalan su edlikù dan diyà te Hiruselim he ebpuun te Bitanya, nevitil sikandin. ¹³Ne nepantew zin dutun is kayu he zehunen he egngезanan te igira. Ne midhendutun si Jesus su ed-ahaan din ke zuen begas dutun. Iyan, hein dutun en, neehè din he wazà begas, kekenà, tekew he menge zahun, su haazà, kenè pa timpu te hustu he kebpmegas. ¹⁴Ne zutun migkagi si Jesus te, “Puun guntaan, kenè ke en egkekeenan te vegas nu.” Nezineg haazà is lalag din dutun te menge sumusundan din.

Is Kedseled ni Jesus Diyà te Valey te Megbevayà
(*Marcos 11:15-19; Mateo 21:12-17; Lucas 19:45-48; Juan 2:13-22*)

¹⁵Ne zutun te nekeuma si Jesus diyà te Hiruselim, ne midseled en maan sikandin diyà te simbahan he Valey te Megbevayà. Ne mibpenegseg din is menge limbungan he etew zutun he ebpemelegyà wey ebpmemasa. Mibpemiley zin is menge lemisahan dutun te ebpmenliwà te menge selapì wey is menge pinuwà te ebpemelegyà te ibpemuhat

he merepatik. ¹⁶Ne wazè din itugut te minsan hentei he ed-uwiten dan is menge gelemiten dan he zutun ebayà te lama te simbahan. ¹⁷Ne mibpenurù din is menge etew zutun, ke sikandin te, “Duen insurat he Lalag te Megbevayà he edhenduen te, ‘Is baley ku, ne egngezanan he valey he elempuanan te langun he menge etew ziyà te minsan hendei he ginhedian.’ Ne sikiyù,” ke si Jesus, “nasì niw veeli he ubpeey te ebpmenlimbung.”

¹⁸Ne nezineg haazà te menge punuan he memumuhat wey menge menunudlù te kesuguan is mibeelan ni Jesus. Nengehandek dan ki Jesus su utew nengesuat is mezakel he menge etew te kebpenurù din. Ne tenged kayi ebpen-ahaan te menge punuan is paagi he metuguti sikandan he igkepehimetayan dan si Jesus.

¹⁹Ne zutun te midsanlep en is andew, mid-awà ensi Jesus dutun te inged.

Is Kegkegangu te Kayu he Igira (*Marcos 11:20-26; Mateo 21:20-22*)

²⁰Ne hein nepawà, midlikù dan dutun te inged ne ziyà te ibayè dan neehè dan kes kayu he igira he nepurung en megangu, minsan is dalid din. ²¹Ne netenuzan haazà ni Pedro ne ke sikandin diyà te ki Jesus te, “Ahaa nu man! Negangu heeyan is kayu he igira he midrewakan nu.” ²²Ne migkagi si Jesus diyà te menge sumusundan din te, “Sarig kew te Megbevayà. ²³Benar is egkegiyen ku keniyu he minsan hentei he egkegiyan din heeyan is buvungan te, ‘Awè ka keniyen ne umpak ka ziyà te zagat,’ ne kenà sikandin eduwazuwa, kekenà, neheget diyà te gehinawa zin he egketuman is migkagi zin, ne haazà is migkagi zin ne egketuman. ²⁴Umba, egkegiyan ku sikiyu he minsan hengkey is ebuyuen niw ziyà te Megbevayà, hegeta niw ziyà te gehinawa niw he kenè en ebperis, ne egkezawat niw haazà is ebuyuen niw. ²⁵Ne emun ed-ampù kew ziyà te Megbevayà, ke zuen egkepeukan niw he minsan hentei, peseyluwa niw, ne is Amey niw he Megbevayà he ziyà te langit, ebpeseyluwen kew zin daan te menge kebpekesupak niw kandin. ²⁶Su emun kenè kew ebpesaylu te zuma niw, is Amey niw he ziyà te langit, kenè kew zin daan ebpeseyluwen te menge kebpekesupak niw.”

Is Ketenged ni Jesus (*Marcos 11:27-33; Mateo 21:23-27; Lucas 20:1-8*)

²⁷Ne nekeuma zan en maan diyà te Hiruselim ne si Jesus, diyà edrigurigu te seled te simbahan he Valey te Megbevayà. Ne midhendiyà te kandin is menge punuan he memumuhat, wey is menge menunudlù te kesuguan, wey is menge ebmegurangan te menge Hudiyu. ²⁸Ne mid-insè dan ki Jesus te, “Heini is langun he ed-ul-ulahan nu zini te simbahan,

duen nu ve ketenged te ked-ulaula kayi, wey hentei is mibegey kenikew te ketenged wey nu meulaula?” ²⁹Ne midtavak si Jesus te, “Duen daan id-insè ku keniyu ne emun egketavak a keniyu, edtevaken ku zaan sikiyu ke hengkey is ketenged ku te ked-ulaula ku kayi te langun. ³⁰Hentei is mibegey ki Juan Megbebewtismu te ketenged din te kebpemewtismu? Megbevayè be wey ke etew zà? Tevaka a.” ³¹Ne zutun mibpein-inseey sikandan is egkagi te, “Emun egkegiyen tew he Megbevayà, ne ed-insà sikandin ke maan is wazè tew tuuwi si Juan. ³²Ne emun egkagi kiw he etew zà, ne egkepeukan kiw te menge etew.” (Umba migkagi zan heini su nahandek dan te menge etew su midtuu is langun he menge etew he ebpeneuven si Juan Megbebewtismu te Megbevayà.) ³³Umba, iyan tavak dan dutun ki Jesus is: “Hanew ta.” Ne ke si Jesus diyà te kandan te, “Kenè ku zaan egkegiyen keniyu ke hengkey is ketenged ku te kebaal kayi te langun.”

Is Sempità Mehitenged te Impeelima te Perasan

(*Marcos 12:1-12; Mateo 21:33-46; Lucas 20:9-19*)

12 ¹Ne impenurù en maan ni Jesus is menge sempità. Ke sikandin te, “Duen etew he zuen din tanà he mibpemulaan din te gawed he paras. Mid-alad din haazà, ne mibudsiyan din te meluag is dekelà he vatu su ebeelan din he keresà te wahig dutun te vegas te paras. Ne midlelawig te ed-ubpaan te ebantey zutun te perasan. Ne mibpeelimahan din haazà is perasan ne zutun midhendiyà te sengeginhedian. ²Ne hein neume en is tiragun dutun, midsugù din is sevaha he suluguen din he ibpekuwa te kandin he vahin dutun te neragun. ³Iyan, hein nekeuma haazà is suluguen din, migewezan dutun te impemeelima zin ne mibugel zan ne impeulì dan sikandin he wazà uwiten. ⁴Ne haazà is tegigaked te perasan, midsugù en maan te sevaha pa he suluguen din, iyan, haazà is suluguen, mibpelian dan diyà te ulu ne mid-eled-eled dan. ⁵Ne haazà is tegigaked, midsugù din pa zutun is selakew pa he suluguen din, ne haazà is suluguen, midhimetayan dan. Mezakel pa zutun is sunudsunud he midsugù din, ne is duma zutun, mibpemugel zan, ne is duma, midhimetayan dan. ⁶Ne te ketepusan dutun, iyan dà nesamà sikan is minahal zin he anak. Ne haazà midsugù din diyà te kandan su egkeisip din is: ‘Kenà egkehimu he kenè dan edtehuzen is anak ku,’ ke sikandin. ⁷Iyan, hein nekeuma haazà is anak dutun te tegigaked, migkagi haazà is impemeelima te, ‘Na! Iyan heini anak din; kuwa kew en su edhimetayan tew wey tew maangken heini is perasan din!’ ⁸Ne zutun migewezan dan sikandin ne midhimetayan dan ne intimbag dan diyà te gawas te perasan.” ⁹Ne mid-uman megkagi si Jesus te, “Ne geina te iyan haazà mid-ulaula zutun te impemeelima te perasan, hengkey is ed-ul-olahan kandan dutun te tegigaked? Ebeyaan din haazà is menge etew

ne ebpenhimetayan din ne ebpeelimahan din haazà is perasan din te selakew en maan he menge etew.” ¹⁰Ne ke si Jesus en maan te, “Siguradu nevasa niw en sikan is insurat he Lalag te Megbevayà he edhenduen te,
 ‘Sikan is batu he himan te valey he watu,
 mid-engkezan te menge pandey
 su kunaan dan ke wazè din pulus.
 Ne heini, nehimu en guntaan
 he watu he iyan dà ebpekepurung te valey.

¹¹Ulaula heini te Nengazen ne igkeinuinu tew utew.’ ”

¹²Ne zutun, haazà is menge punuan te menge Hudiyu, nesavut dan he iyan sikandan ebpesumbingayan ni Jesus dutun te sempità he migkagi zin, ne ed-isipen dan en pezem edekepa si Jesus, iyan, wazè dan mehimu haazà is ed-isipen dan su nahandek dan te mezakel he menge etew. Ne zutun nepesagdan dan si Jesus ne mid-ewaan dan.

Is Kebayad te Vuhis Diyà te Hadì te Ruma
(Marcos 12:13-17; Mateo 22:15-22; Lucas 20:20-26)

¹³Ne midsugù dan is duma zutun te menge Perisiyu wey te menge sakup te upakat he midtukud ni Hirudis su wey zan mepulutikahi si Jesus he meveeli zan te sumbung. ¹⁴Ne hein nekeuma haazà is menge sugù, migkagi zan diyà te ki Jesus te, “Menunudlù, netuenan dey he metazeng ka he etew. Is lalag te menge etew, kenà ebpekehalin te ibpenurù nu tenged te wazè nu ibpelavi he minsan hentei, kekenà, tutuu is ibpenurù nu he ibpeveelan kenitew te Megbevayà. Umba, kegiyi key kenikew, ebpekesupak ki ve te kesuguan tew ke ebayad ki te vuhis diyà te hadì tew he ziyà te inged he Ruma?” ¹⁵Ne netuenan ni Jesus he akal haazà is netagù diyà te gehinawa zan, ne ke sikandin te, “Maan is egezaman a keniyu? Ipeehe niw kediey ke memenumenu is selapì he ibayad niw te vuhis diyà te hadì he ziyà te Ruma.” ¹⁶Ne impeehe dan dutun ki Jesus is sengeelad he selapì. Ne ke si Jesus te, “Hentei ki zagwey wey ngazan heini is nekesurat kayi?” Ne midtavak dan te, “Ngazan wey zagwey te hadì diyà te Ruma.” ¹⁷Ne ke si Jesus te, “Ne emun kandin ne iyan egkesuatan din, ivegey niw ziyà te kandin, ne ivegey niw zaan diyà te Megbevayà is kandin he azen.” Ne utew zan ingkeinuinu haazà is migkagi ni Jesus.

Is Ketudluanan Mehitenged te Kegkevanhew
(Marcos 12:18-27; Mateo 22:23-33; Lucas 20:27-40)

¹⁸Ne zuen daan menge Sedusiyu he midhendiyà te ki Jesus. Ne is menge Sedusiyu, iyan kes menge Hudiyu he edtuu he kenà egkengevanhew keuzemà is minsan hentei. ¹⁹Ne migkagi zan diyà te ki Jesus te, “Menunudlù, impenurù dengan ni Moises he penenglitan, ke

zuen maama he zuen din esawa ne ebpatay haazà is maama ne wazà mevuwad, kinahanglan he ebpemeluwen te suled dutun te maama haazà is ipag din su wey mevuwad haazà is minatey pinaagi zutun te suled din.

²⁰Ne zengan duen pitu he minge maama he teltelehazi. Mibpengesawa sikan is kakey, iyan, minatey he wazà med-anak. ²¹Ne mibpemalu zutun te ikezuwa haazà is ipag dan ne minatey zaan ne wazà mevuwad. Ne iring din ded haazà is iketelu. ²²Ne henduen dà duen su naamin haazà is pitu ikevalu zutun te vahi ne wazà mevuwad. Ne te huziyan dutun, minatey zaan haazà is bahi. ²³Ne keuzemà te kegkevanhew te minge etew, hentei is hustu he esawa zutun te vahi? Su haazà is pitu he teltelehazi, pudu zan man nemekeesawa zutun te vahi.”

²⁴Ne zutun, midtavak ni Jesus sikandan te, “Umba ves nengesayep kew su wazè niw mesavut sikan is ingkesurat he Lalag te Megbevayà, ne wazè niw zaan mesavut he mekegegehem sikandin te kebpemanhew te minge minatey. ²⁵Su zutun te kegkevanhew te etew he nemematey, wazè en ebpengesawa he maama ne wazè en daan bahi he ebpeesawa su egkengeiring en pudu is minge etew te velinsuguen te Megbevayà diyà te langit ne kenè dan ebpees-eseweey. ²⁶Ne mehitenged te minge minatey he ebenhawen, wazè niw ve mevasa ziyà te libru he insurat dengan ni Moises kes egkeregreg he sagbet he zutun mibpaahà kandin is Megbevayà? Su minsan te minatey en dutun si Abraham wey si Isaak wey si Hakub, migkagi is Megbevayà diyà te ki Moises te, ‘Iyan a Megbevayà he ed-ezopen ni Abraham wey ni Isaak wey ni Hakub,’ ²⁷*he ke vā dā egkegiya, kemulu zan pa ed-azap te Megbevayà, su is ed-azap kandin minsan ke ebpatay, duen din pa untung. Umba utew kew nengesayep.*”

Is Utew Lavew he Sugù

(Marcos 12:28-34; Mateo 22:34-40; Lucas 10:25-28)

²⁸Ne zuen dutun sevaha he menunudlù te kesuguan he nezineg din is kebpekidlewanè dan ki Jesus ne hein nesavut din he utew tutuu is minge tavak ni Jesus kandan, mid-insà sikandin te, “He Menunudlù, hendei zapit is edhuna zuen te langun he kesuguan?” ²⁹Ne midtavak si Jesus te, “Iyan heini is edhuna: ‘Pemineg kew, sikiyu is minge kevuwanan ni Israyil. Is Megbevayà tew he Nengazen te langun, sebsevaha zà sikandin he Megbevayà. ³⁰Kinahanglan he iyan nu sikandin mahala ziyà te gehinawa nu is Megbevayà he Nengazen tew. Iyan nu sikandin mahala ziyà te gehinawa nu, isip nu, kedsavut nu wey tivuuk he ulaula nu.’ ³¹Ne is ikezuwa, iyan heini: ‘Kinahanglan he mahala nu is duma nu; isipa nu sikandin he iring te kenikew en he gehinawa.’ Wazè en insugù kenitew he ebpekelavew kayi te zezuwa.” ³²Ne zutun migkagi haazà is menunudlù te kesuguan diyà te ki Jesus te, “Tutuu iyan. Nevenaran a kenian te egkegiyen nu he sebsevaha zà is Megbevayà ne wazè en duma pa he Megbevayà. ³³Ne is kebmahala

ta te Megbevayà he Nengazen diyà te gehinawa ta, diyà te isip ta, diyà te kedsavut ta wey ziyà te tivuuk he ulaula ta, wey is kebmahala ta te zuma ta he iring en sikandin te keugelingen ta he gehinawa, ne lavew pa heini kenà te langun he minge pemuhat he edtutungen wey minge halad.” ³⁴Ne nesavut ni Jesus he utew hustu haazà is migkagi zutun te menunudlù ne migkagi si Jesus te, “Benar heeyan; meseyun ka ebpekepahadi te Megbevayà.” Ne zutun wazè en maan nekeaku pa he egezam ki Jesus pinaagi te minsan hengkey he insè.

Is Hadì he Mibpili te Megbevayà he Kevuwazan ni David
(*Marcos 12:35-37; Mateo 22:41-46; Lucas 20:41-44*)

³⁵Ne te ebpenurù si Jesus te minge etew ziyà te simbahan he Valey te Megbevayà, mid-insà sikandin te, “Maan is egkehimu he ibpenurù te minge menunudlù te kesuguan he is ebpeebuten he hadì, kevuwazan dà ni Hadì David? ³⁶Umba id-insè ku heini su mid-ulinan si Hadì David te Wagas he Mulin-ulin ne migkagi, ke sikandin te,
‘Migkagi is Megbevayà diyà te Nengazen ku te,
‘Kayi ka pinuu te zapit te egkekewanan ku
taman te kenè ku pa ibpeluhud diyà te kenikew is minge kuntada nu.” ’ ’ ”

³⁷Ne impelaus ni Jesus haazà is egkegiyen din te, “Emun migkagi ni David he Nengazen din is ebperetengen he ibpahadi, kenà egkehimu he kevuwazan dà duen ni Hadì David.” Ne utew nengesuat is mezakel he minge etew zutun te kebbenurù kandan ni Jesus.

Is Menge Etew he Uvag Edsunud te Megbevayà
(*Marcos 12:38-40; Mateo 23:1-36; Lucas 20:45-47*)

³⁸Ne zutun te kebbenurù din, ke sikandin te, “Andam kew limbe wey kew kenà mekeiring te minge menunudlù te kesuguan su iyan dà egkesuatan dan is kedhiphipanew he memelayat is kemisula he edtehuzen sikandan te minge etew emun diyè dan te mirkadu. ³⁹Ne emun diyè dan te simbahan, egkesuatan dan he iyan sikandan ibpepinuu ziyà te ebpepinuuwan te lavew he minge etew. Ne egkesuatan dan daan he utew zan metahud ke edtelavuk dan te keemuran. ⁴⁰Ne heini is minge menunudlù te kesuguan, edlimbungan dan is minge valu he vahi wey zan maangken is minge valey zutun te minge vahi. Ne utew melugayad is ked-ampù dan he iyan idtambun dan te mezaat he vaal zan. Ne utew edekelà is silut te Megbevayà kandan keuzemà.”

Is Halad Duen te Valu he Vahi
(*Marcos 12:41-44; Lucas 21:1-4*)

⁴¹Ne sevaha he timpu zutun he ziyà ebpimpinuu si Jesus te seled dutun te simbahan he Valey te Megbevayà, ne ziyà sikandin te uvey

te teleguey te halad he selapì. Ne ebantey sikandin te minge etew he edsavuk te halad dutun te teleguey. Ne mezakel is minge sepian dutun he utew zekelà he selapì is insavuk dan dutun. ⁴²Ne nekeuma zutun is balu he vahi he utew egkeayuayu. Ne inhalad din is dezuwa he selapì he tumbaga he utew zeisey is bali zin. ⁴³Ne zutun mid-umew ni Jesus is minge sumusundan din he med-uvey zan diyà te kandin ne ke sikandin te, “Benar is egkegiyen ku he haazà is balu he vahi, sumalà is ked-isipa te Megbevayà, utew lavew is inhalad din te langun he inhalad kayi te zuma he minge etew. ⁴⁴Su is minge zuma he nemenhalad kayi, subra zà te ketigeyunan dan is inhalad dan. Iyan, heeyan is egkeayuayu he vahi, minsan pa te edlisedlised sikandin te igkeuyag din, inhalad din is namànamè en he ketigeyunan din.”

Is Egkeuma he Pesipala

(Marcos 13:1-23; Mateo 24:1-28; 10:17-22; Lucas 21:5-24)

13 ¹Ne zutun te ked-awà ni Jesus dutun te zekelà he simbahan he Valey te Megbevayà migkagi ziyà te kandin is sevaha te minge sumusundan din te, “Ahaa nu heini is simbahan. Uteu zezekelà is minge vatu he imbevaley kayi ne utew meupiya is kegkeveeli zin.” ²Ne migkagi si Jesus diyà te kandin te, “Heeyan is dekelà he simbahan, he vatu is imbevaley zuen, wazà keuzemà minsan sevaha he vatu he ebpekeuntud diyà te sevaha su egkewagey heeyan is langun.”

³Ne hein diyè dan te vuvungan he egngezanan te Ulivuwan, egkepantew zan sikan is dekelà he simbahan. Ne mid-insaan si Jesus eni Pedro, Santiago, Juan, wey Andres dutun te wazè dan duma, ⁴ke sikandan te, “Kegiyi key ke keenu egkehitavù heini is langun wey ke hengkey is egkeulaula he tuus he iyan en timpu he egketuman sikan is langun he migkagi nu geina.”

⁵Ne migkagi si Jesus diyà te kandan te, “Mebpekevantey kew wey kenè kew mekesundan te teruen he etew ⁶su mezakel is ebpemenlepew he egamit te ngazan ku he egkagi is kada sevaha zutun he iyan sikandin sikan is mibpilì te Megbevayà he ibpahadì. Ne mezakel is ebpeketuu te minge tarù dan. ⁷Ne emun egkezineg niw ziyà te uvey niw is megurub tenged te gira ne egkezineg niw zaan is tudtul te minge gira ziyà te meziyù he tanà, kenè kew mahandek su kinahanglan he egkeulaula is iring kayi te kenè pa edtepusen heini is timpu. ⁸Su ebpekidtebek is sengeinged te zuma zin he inged ne egira is sengeginhedian te zuma zin he ginhedian. Egkehitavù is linug diyà te mezakel he minge inged ne zuen minge inged he ebitilen. Iyan, heini he egkehitavù, ne iring te ed-anak he sikan pa ebpuunà is belilit din.

⁹Ne sikiyu, kinahanglan he purungi niw endama is gehinawa niw, su edekepen kew te minge etew ne ed-uwiten kew zan diyà te hukuman

ne ebugelen kew ziyà te minge simbahan dan. Ebpekeetuvang kew te minge gubirnedur wey minge hadi tenged te kedtuu niw kediey wey niw ikewali is Meupiya he Tudtulanen diyà te kandan. ¹⁰Su te kenè pa egketapus haazà is timpu, kinahanglan he ihuna ipesavut is Meupiya he Tudtulanen diyà te minge etew ziyà te langun he minge ginhedian. ¹¹Ne zutun te kedekepa keniyu su ed-uwiten kew ziyà te hukmanan, kenè niw igkesamuk ke hengkey is egkegiyen niw su emun dutun kew en, iyan niw egkekagi is ibpekagi keniyu te Megbevayà su is minge lalag he egkekagi niw zutun ne kenè en keniyu, kekenà, lalag he ibpekagi keniyu te Wagas he Mulin-ulin. ¹²Ne zutun he timpu zuen minge etew he ibpehimetayan dan is minge suled dan. Ne zuen daan minge amey he ibpehimetayan dan is minge anak dan. Ne zuen minge etew he egkuntedahan dan wey ibpehimetayan dan is minge lukes dan. ¹³Egkuntedahan kew te langun tenged te sumusundan ku sikiyu. Iyan, sikan is edhamen te kedtuu zin kedi taman te ketepusan dutun te minge kemeresayan, ebegayan te untung he wazè din pidtemanan.

¹⁴Ne is egngezanan te melimezang he ebpekekaid, emun egkeehè niw he ziyè en haazà te simbahan he Valey te Megbevayà he wazà itugut kandin, ne sikan is diyà te prubinsya he Hudiya, mebpelaguy zan pehendiyà te vuntud. (Is ebpekevasa kayi te tagnà dengan mehitenged kayi, kinahanglan he sevuta zin.) ¹⁵Ne sikan is etew he egkeserengà diyà te gawas te valey zin, kenè en med-usik-usik pa te timpu te kedseled diyà te valey he egkuwa te minsan hengkey te azen din. ¹⁶Sikan is etew he ziyà egkeserengà te pemuleey zin, kenè en med-ulì pa ziyà te valey zin te kegkuwa te malung din. ¹⁷Ne zutun he andew, kehizu utew te minge vahi he memegingey wey ebpemenlegimu *su utew zan egkengeregenan he ebpelaguy*. ¹⁸Iampù niw ziyà te Megbevayà he kenà heini mekeserengà is kebpelaguy zutun te timpu te megenew. ¹⁹Su wazè en ebpekerepeng te kemeresayan he egkehitavù dutun he andew. Ne puun pa te aney en kedlimbaga te kelibutan wazè pa meegiye is iring dutun. Ne emun egkehitavù en haazà ne kenè en egkehitavù pa maan is iring dutun minsan keenu. ²⁰Midterinan en te Nengazen haazà is timpu te kemeresayan su emun wazà, ne egkelimas dutun is tivuuk he menusiya. Iyan, tenged te hizu zin te minge pinili din he minge etew, midterinan din haazà is timpu te kemeresayan.

²¹Ne ke zuen egkagi keniyu te, 'Ahaa niw, heini en kes hadi he mibpili te Megbevayà,' wey ke zuen be egkagi te, 'Heeyan en sikandin,' ne kenè kew mebpemineg dutun te egkagi. ²²Su ebpenlepew is teruen he etew he egkegiyen dan he iyan sikandan sikan is hadi he mibpili te Megbevayà wey ke egkegiyen dan be he ebpeneuven sikandan te Megbevayà. Ne ebpemeehè dan te egkengein-inuwan wey minge singyal su ibpetuu zan pezem te minge tarù dan, ke egkehimu, is minge pinili te Megbevayà.

²³Umba mebbekevantey kew su midtutdul ku en keniyu heini is langun he egkehitavù te wazè pa meulaula.

Is Kedlikù ni Jesus

(Marcos 13:24-37; Mateo 24:29-44; Lucas 21:25-33)

²⁴Ne emun egkeiwas haazà is timpu te kemeresayan, kenè en edsilà is andew ne kenè en daan ed-anlag is bulan. ²⁵Ne egkengeulug is menge vituen diyà te langit ne egkengehuyung is menge kedesenan diyà te hewhewanan. ²⁶Ne zutun, siak is Kakey te Menuiya, egkeahà a ziyà te menge gapun is ebpekeuma he utew zekelà is gehem ku wey utew merayag is ked-anlag ku. ²⁷Ne zutun edsuguen ku is menge velinsuguen ku pehendiyà te heepat he pesagì kayi te kelibutan. Ne edtigumen dan is menge pinilì ku he etew he ebpuun te minsan hendei kayi te lumpad te kelibutan.

²⁸Isipa niw heini is impenurù ku keniyu pinaagi te sempità he kayu he igira. Dini te kenita, emun ebpeneringsing en is subpang din ne ebpenlumbey en, egketuenan ta he megaan en is gulavung. ²⁹Ne iring din ded daan, emun egkeehè niw he egkengetuman en is langun kayi te migkagi ku, egketuenan niw he megaan a ebpekeliù. ³⁰Tenuzi niw is egkegiyen ku keniyu: he emun egkeehè niw he egkengetuman en heini kenè kew pa egkeamin ebpatay taman te kenè pa egkengetuman heini is langun. ³¹Egkehanew is langit wey tanà, iyan, heini is migkagi ku, kenà mulà egkehanew te minsan keenu.

³²Is Amey tew he Megbevayà, iyan dà nesayud ke keenu egketuman heini is langun. Ne gawas kandin wazè en nesayud te andew wey uras ke keenu heini egkehitavù. Is menge velinsuguen te Megbevayà diyà te langit, wazè dan mesayud wey minsan siak is Anak te Megbevayà, wazà a zaan mesayud. ³³Ne tenged kayi, mebbekevantey kew ne tagamtagam kew su kenè niw heini egketuenan ke keenu. ³⁴Su iring a te sevaha he etew he midhipanew he wazè din teleena ke keenu ed-ulì. Is menge suluguen din ne impevantey zin te menge azen din. Ne mibpemegayan din is kada sevaha kandan te ketengdanan he ed-ul-ulahan dan dutun te kedhipanew zin. Ne migkegiyan din is etew he impevantey zin te gemawan he kenà sikandin medlipezeng. ³⁵Umba, purungpurung kew su wazè niw metueni ke keenu a ebpekeuma is tegigaked te valey, ke mahapun be, ke liwazè be te kezukileman, wey ke egkepkepawè be wey ke edsilà en be is andew. ³⁶Kinahanglan he kenè ku sikiyu egkeumahan he nekelipezeng dutun te kedtekewtekew ku kedlikù. ³⁷Heini is egkegiyen ku keniyu, egkegiyen ku zaan diyà te langun he etew he mebbekevantey is kada sevaha.”

Is Bitiyara Mehitenged te Kedekepa ki Jesus

(Marcos 14:1,2; Mateo 26:1-5; Lucas 22:1,2; Juan 11:45-53)

14

¹Mekezuwa pa zutun, egketuman is Pista te Kedlevayi wey Pista te Kegkeena te Supas he Wazè Din Tapey. Is menge punuan he

memumuhat wey is menge menunudlù te kesuguan, ebpengahaan dan is paagi wey zan mezakep si Jesus he kenà egketuenan te mezakel he menge etew wey mehimetayi. ²Ne ke sikandan te, “Kenè tew edekopen sikandin te timpu te pista su kela ke edsinamuk is menge etew.”

Is Kebpetigis te Pehemut

(Marcos 14:3-9; Mateo 26:6-13; Juan 12:1-8)

³Ne sevaha he timpu zutun he ziyà si Jesus te inged he Bitanya, diyà sikandin te valey ni Simon te it-iten he neulian en. Ne zutun te egkaan dan, nekeuma is bahi he ed-uwit te pelenahan he mibeelan puun te watu he elebastru he midteguan haazà is pelenahan te mehemut he agwa he mahal utew su lunsey he nardu. Ne mid-uvayan si Jesus dutun te vahi ne midrupet din haazà is bivig dutun te pelenahan ne imbusbus din diyà te ulu ni Jesus haazà is agwa. ⁴Ne is duma he etew he nekeahà dutun, wazè dan ikesuat haaza, ne mibpelelelagè dan te, “Maan is mid-ususikan din heeyan is agwa te wazà pulus? ⁵Mahal utew heeyan su is bali zin, ne subra he tetelu he gatus he elad he selapì. Meupiya pa pezem ke imbelegyà, ne is halin, igkepemegey ziyà te egkengeayuayu.” Ne midsawey zan haazà is mid-ulaula zutun te vahi. ⁶Ne migkagi zutun si Jesus te, “Pesegdana niw sikandin. Maan is edsewayen niw sikandin? Utew meupiya heini is mid-ulaula zin dini te kediey. ⁷Layun niw egketevangi is egkengeayuayu su kenè niw mulà sikandan egkesuwey, iyan, siak, megaan ku en sikiyu egkesuwey. ⁸Sumalà is egkehimu kayi te vahi ne midhimu zin en dini te kedì. Mid-egwahan e zin he zaan wey metegana is lawa ku te kedlevenga kedì. ⁹Tenuzi niw he kenà sikandin egkelipatan. Su minsan hendei idsangyew is Meupiya he Tudtulanen dini te tivuuk he kelibutan, egketudtul zaan heini is mid-ulaula zin kedì.”

Is Paagi te Kedekepa ki Jesus

(Marcos 14:10,11; Mateo 26:14-16; Lucas 22:3-6)

¹⁰Ne zutun, si Hudas he tigKeriyuti, sevaha zutun te sepulù wey zezuwa he menge sumusundan din, midhendiyà sikandin te menge punuan he memumuhat su ibpalad din si Jesus diyà te kandan. ¹¹Ne hein netuenan dutun te menge punuan ke hengkey is inhendutun din, ne utew zan nengesuat. Ne mibpesarig sikandan he ebegayan dan si Hudas te selapì. Ne puun dutun mibpengahà si Hudas te paagi te ked-ekali zin ki Jesus.

Is Kedseulug ni Jesus Duma te Menge Sumusundan Din

(Marcos 14:12-21; Mateo 26:17-25; Lucas 22:7-14,21-23; Juan 13:21-30)

¹²Ne zutun neume en is nehuna he andew te Pista te Kegkeena te Supas he Wazè Din Tapey. Iyan haazà andew te kedlepaa te menge

Hudiyu te ibpemuhat he nati he kerehidu he egkeenen dan dutun te Pista te Kedlevayi. Ne zutun mid-insaan si Jesus te minge sumusundan din te, “Hendei is egkesuatan nu he valey he edhilutuan dey wey zey metegana is idlavung nu te Pista te Kedlevayi?” ¹³Ne midsugù ni Jesus is dezuwa zutun te minge sumusundan din ne migkegiyan din te, “Hendiyan kew te inged ne egkeuma niw is maama he ed-uwit te umuy he nepenù te wahig. ¹⁴Tundug kew kandin pehendiyà te valey he edselezan din, ne kegiyi niw is tegigaked dutun te valey te, ‘Ibpeinsà te zatù tew kenikew ke hendei he rugu sikandin egkaan duma te minge sumusundan din kayi te Pista te Kedlevayi.’ ¹⁵Ne zutun ibpeehè din keniyu is meluag he rugu ziyà te zivavew zutun he zaan en nehimani. Ne zutun niw tegenaha is idlavung tew.”

¹⁶Ne haazà is minge sumusundan din, migenat dan pehendutun te inged ne langun duen te migkagi ni Jesus ne iyan en iyan neehè dan ne zutun dan tegenaha is idlavung te Pista te Kedlevayi.

¹⁷Ne hein mezukilem dutun, si Jesus wey is sepulù wey zezuwa he sumusundan din, nekeuma zan dutun te valey. ¹⁸Ne te ziyè dan te lemisahan su kemulu zan pa egkaan, migkagi si Jesus te, “Duen egkegiyen ku keniyu. Iyan is: sevaha keniyu kayi te ebpemengaan guntaan he zuma ku is ed-akal kedì wey a mehimetayi.” ¹⁹Ne zutun utew nengeseeng haazà is minge sumusundan ni Jesus, ne is kada sevaha zutun, mid-insè dan kandin te, “Kela ke iyan a?” ²⁰Ne ke si Jesus te, “Iyan is sevaha keniyu te sepulù wey zezuwa he ebpekidtugen kedì kayi te edtengelan. ²¹Siak is Kakey te Menusiyà, ebpatay a sumalà te netagnà duen te insurat he Lalag te Megbevayà, iyan, kehizu utew te etew he ed-akal kedì. Meupiya pa ziyà te kandin ke wazè en sikandin ianak.”

Is Kedlavung te Nengazen

(Marcos 14:22-26; Mateo 26:26-30; Lucas 22:15-20; 1 Kurintu 11:23-25)

²²Ne zutun te kemulu zan pa egkaan, mid-amì si Jesus duen te supas, ne mibpeselematan din diyà te Megbevayà ne mibpenevitevi din haazà ne impemegey zin dutun te minge sumusundan din. Ne ke sikandin te, “Iyan heini lawa ku; keena niw.” ²³Ne mid-amì din dutun is tasa he midteguan te vinu he paras ne mibpeselematan din daan te Megbevayà ne induwal zin diyà te kandan. Ne pudu sikandan mid-inum dutun. ²⁴Ne migkagi si Jesus te, “Iyan heini lengesa ku he ibpetigis wey mepelisi is mezakel he minge etew. Tuus heini te paagi te kegelibri he midtukud te Megbevayà.” ²⁵Benar is egkegiyen ku he puun guntaan, ne kenà ad maan ed-inum kayi te vinu taman dutun te timpu keuzemà he ed-iinumè kiw te vegu en he vinu emun edhadì is Megbevayà. ²⁶Ne zutun migkanta zan te kedalig te Megbevayà ne hein nepasad haazà, migawas dan ne midhendiyè dan te vuvungan dutun he egngezanan te Ulivuwan.

Is Kegkegiya ni Jesus te Kebarew ni Pedro

(Marcos 14:27-31; Mateo 26:31-35; Lucas 22:31-34; Juan 13:36-38)

²⁷Ne migkegiyan ni Jesus haazà is minge sumusundan din te, “Is langun te sikiyu, edluyahan is kedsarig niw kediey su zuen insurat he Lalag te Megbevayà he edhenduen te, ‘Edhimetayan ku is ed-elima te minge kerehidu ne ebpekedsusuwey is minge kerehidu.’ ²⁸Iyan,” ke si Jesus, “dutun te kegkevanhew ku, edhuna a keniyu ziyà te prubinsya he Geliliya.” ²⁹Ne zutun migkagi si Pedro ziyà te kandin te, “Minsan ke edluyahan is kedsarig kenikew kayi te langun he minge zuma ku ne kenà mulà edluyahan is kedì, minsan egkemenumenu.” ³⁰Ne ke si Jesus diyà te ki Pedro te, “Benar is egkegiyen ku he te kenè pe kan ed-ukarà is manuk te kezezuwa guntaan te mezukilem ne ketetelu ke en ebpekekagi he kenà a kenikew egkekilala.” ³¹Ne wazà mevenari zutun si Pedro, ke sikandin te, “Minsan pa ke edhimetayan a zuma kenikew ne kenà a egkagi he wazè ku sikew mekilala.” Haazà he lalag, iyan daan pesarig dutun te minge zuma zin he minge sumusundan.

Is Ked-ampù ni Jesus Diyà te Gitsimeni

(Marcos 14:32-42; Mateo 26:36-46; Lucas 22:39-46)

³²Ne nekeuma ensi Jesus diyà te lugar he migngezanan te Gitsimeni. Migkegiyan din is minge sumusundan din te, “Kayi kew zà pinuu taman te ebpekepasad a is ed-ampù.” ³³Ne zutun miduma zin si Pedro, si Santiago, wey si Juan, ne midlaus dan pa ziyà te egkehunaan dutun. Utew neseeng sikandin wey mibmesakit utew is gehinawa zin. ³⁴Ne migkagi sikandin diyà te kandan te, “Utwew mesakit is gehinawa ku. Henduen be te egkevidthew en. Kayi kew zà ne kenè kew medlizepeng.” ³⁵Ne midlaus pa sikandin diyà te egkehunaan dutun ne midlangkeb diyà te tanà ne mid-ampù diyà te Megbevayà he ke egkehimu pa ne kenè en kandin ipesegazan haazà is merasey he imbanglis kandin. ³⁶Ke sikandin dutun te ked-ampù din te, “Amey ku, egkehimu nu is minsan hengkey ne emun egkehimu zà ne kenà a kenikew ipehimetayi, iyan, kenà egkesunud is kediey he egkesuatan, kekenà, iyan egkesunud is kenikew.”

³⁷Ne midlikù si Jesus ne neehè din haazà is tetelu he sumusundan din he nemekelipezeng, ne migkegiyan din si Pedro te, “Simon, nekelipezeng ke ve? Wazè nu ve metigker he kenè ka edlizepeng te minsan sengeuras dà?” ³⁸Ne migkegiyan sikandan ni Jesus te, “Kenè kew lipezeng, kekenà, ampù kew wey kew mekelikey te minge penggezam keniyu. Edsunud pezem is gehinawa niw, iyan, meluya is lawa niw.”

³⁹Ne zutun midlikù si Jesus ne mid-uman med-ampù te iyan ded gihapun sikan is in-ampù din. ⁴⁰Ne zutun midlikuan din haazà is minge sumusundan din, ne neehè din he nemekelipezeng dan su wazè

dan maantus is kebpemetpetayi kandan te tuzug. Ne zutun wazè dan egketuenan ke hengkey is ibpengetezengan dan diyà te ki Jesus.

⁴¹Ne netegtegaad pa zutun midlikuan din en maan sikandan te iketelu, ne ke sikandin diyà te kandan te, “Kemulu kew ves nehurep he ebpemenhidhizegà? Netengkaan en heeyan su iyan en heini timpu he siak is Kakey te Menuiya, ibpalad a ziyà te minge lalung he etew. ⁴²Enew kew su heini en sikan is etew he ed-akal kedì. Edsinugungen tew.”

Is Kedekepa ki Jesus

(Marcos 14:43-52; Mateo 26:47-56; Lucas 22:47-53; Juan 18:3-12)

⁴³Ne zutun te kemulu pa egkagi si Jesus, nekeuma si Hudas is sevaha zuen te sepulù wey zezuwa he minge epustul. Duma zin is minge etew he nengegumeenan te ubpit wey lagkut. Minge sugù haazà te minge punuan te memumuhat wey minge menunudlù te kesuguan wey minge ebmegurangen te minge Hudiyu. ⁴⁴Si Hudas, is giya zan diyà te ki Jesus, migkagi zin he zaan ke hengkey is tuus te kegketueni zan ki Jesus, ke sikandin te, “Is etew he edhezekan ku, ne iyan en ebpen-ahaan niw. Ne zekepa niw en ne purungi niw ventayi ke ed-uwiten niw.”

⁴⁵Ne zutun te kebpekeuma ni Hudas, segugunè din mid-uvayi si Jesus ne migkagi te, “Na! Menunudlù!” Ne midhezekan din. ⁴⁶Ne midakep dutun te minge etew si Jesus ne mibpekehemenan dan te egawed.

⁴⁷Iyan, sevaha te zaan he etew zutun, midhulavut din is sundang din ne midtibas din is suluguen te lavew he memumuhat ne netenaan haazà diyà te telinga ne nesapla haazà is telinga zin. ⁴⁸Ne zutun migkagi si Jesus diyà te minge edakep kandin te, “Tulisan e ve? Su maan is negumeenan kew te minge ubpit wey lagkut is edakep kedì? ⁴⁹Kada andew ne zuma a keniya ziyà te Valey te Megbevayà is ebpenurù ne wazà a keniya zutun dà dekepa. Iyan, egkeulaula heini su egketuman sikan is minge tagnà diyà te insurat he Lalag te Megbevayà.” ⁵⁰Ne zutun mid-ewaan sikandin te minge sumusundan din su mibpemelaguy zan.

⁵¹Ne zuen dutun kenakan he ebmemalung dà is midtelukun ki Jesus. Ne edeopen pezem haazà dutun te minge etew, ⁵²iyen, midleguwat ne nekepelaguy sikandin is wazè en seseberen din su netagak haazà is malung din he negewezan dutun te minge etew.

Is Ked-imbistigaha ki Jesus te Minge Punuan

(Marcos 14:53-65; Mateo 26:57-68; Lucas 22:54,55,63-71; Juan 18:13,14,19-24)

⁵³Mid-uwit dan si Jesus diyà te valey ni Keyipas he iyan lavew he memumuhat, ne zutun netigum he zaan is minge punuan he memumuhat, minge menunudlù te kesuguan, wey is minge ebmegurangen te minge Hudiyu. ⁵⁴Ne si Pedro, midtinundug daan

asal kenà utew ed-uvey ne ziyè dà medtaman te lama zutun te valey te lavew he memumuhat. Ne mibpinuu sikandin dutun is ed-amur ziyà te menge guwardya ne midhizazang diyà te hapuy zutun. ⁵⁵Ne is menge punuan te memumuhat wey is langun he nengetigum he ebmegurangan te menge Hudiyu, ebpen-ehè dan te salà he id-ulug dan ki Jesus su wey zan mehimetayi, iyan, wazè dan egkeahà. ⁵⁶Mezakel is menge teruen he midsumbung te menge vaal ni Jesus, iyan, wazà mengeuyun haazà is ebpemenistigus dutun.

⁵⁷Ne zutun duen menge teruen he etew he mid-etuvang ne migkagi zan is sumbung dan mehitenged ki Jesus, ⁵⁸ke sikandan te, “Nezineg dey heeyan he etew he egkagi te, ‘Edrundusen ku heini is simbahan he Valey te Megbevayà he vineelan te etew ne seled te tetelu he andew ebpekevangan ad te vegu he kenà bineelan te etew,’ ” ke sikandan. ⁵⁹Iyan, haazà is ebpemenumbung, kenà daan egkeuyun haazà is kedsumbunga zan ki Jesus.

⁶⁰Ne zutun, midhitindeg diyà te teliwazà is lavew he memumuhat ne migkegiyan din si Jesus te, “Tutuu ve heini is menge sumbung dan mehitenged kenikew? Hengkey is igketavak nu?” ⁶¹Ne wazà si Jesus medtavak. Ne mid-uman megkagi haazà is lavew he memumuhat te, “Iyan ke ve kes mibpili he ibpahadi he Anak te Megbevayà?” ⁶²Ne zutun midtavak si Jesus te, “Iyan a, ne keuzemà, egkeahà a keniyu is Kakey te Menusiyà he ziyà ebpinuu te zapit te egkekewanan te Megbevayà. Ne egkeahà a zaan keniyu ziyà te menge gapun is ebulus he ebpuun diyà te langit.” ⁶³Ne zutun, haazà is lavew he memumuhat, mibpemindas din is kumbalè din *he tuus te utew sikandin nepauk dutun te migkagi ni Jesus. Ne ke sikandin te, “Wazè en kinahanglan he zuen pa tistigus su sikiyu is langun,* ⁶⁴nezineg niw en is menge lalag din he utew supak te Megbevayà. Hengkey is hukum niw?” Ne zutun migkagi is langun he menge zuma zin te zekelà is salà ni Jesus ne kinahanglan he edhimetayan.

⁶⁵Ne is menge zuma zutun, mid-ilevan dan si Jesus, ne mibedbed dan is mata zin ne midsumbag dan te egkagi te, “Tegnaa nu ke hentei is midsumbag kenikew!” Ne migewezan sikandin te menge sundaru zutun ne mibpenabpi dan sikandin.

Is Kebarew ni Pedro

(Marcos 14:66-72; Mateo 26:69-75; Lucas 22:56-62; Juan 18:15-18,25-27)

⁶⁶Ne si Pedro, kemulu pa zutun te lama te valey ne zuen bahi he suluguen te lavew he memumuhat he mid-uvey ziyà te kandin. ⁶⁷Ne hein neehè din si Pedro is edhizazang midtengtengan din ne migkagi te, “Sikew, duma ka zaan ni Jesus he tigNeserit.” ⁶⁸Ne si Pedro, mibarew

zin haazà te, “Wazè ku hanew ke hengkey is egkegiyen nu ne kenè ku zaan egkesavut ke hengkey is ibpesavut nu.” Ne migawas si Pedro zutun pehendiyà te pultahan te lama. Ne zutun mid-ukarà is manuk. ⁶⁹Ne neehè en maan si Pedro dutun te vahi ne mid-uman megkagi haazà is bahi ziyà te minge etew zutun te, “Heini he etew, duma eni Jesus.” ⁷⁰Iyan, hein nezing haazà ni Pedro mibarew zin pa. Ne hein netegtegaad dutun, is minge etew he nerivurun dutun, migkegiyan dan si Pedro te, “Tutuu iyan he zuma ke zin. Egketuusan su tigGeliliya ka zaan.” ⁷¹Ne zutun, mid-amin-amin si Pedro te sapà, ke sikandin te, “Siluti a te Megbevayà ke tarù is lalag ku he kenè ku egkekilala heeyan he etew is egkegiyen niw.” ⁷²Ne zutundutun mid-ukarà is manuk te ikezuwa ne human metenuzi ni Pedro sikan is migkagi kandin ni Jesus he ke sikandin te, “Te kenè pe kan ed-ukarà is manuk te kezezuwa, ne ketetelu ke en ebpekekagi he kenà a kenikew egkekilala.” Ne zutun nekelelendag si Pedro su utew mibmesakit is gehinawa zin.

Is Ked-imbistigaha ni Pilatu ki Jesus

(Marcos 15:1-5; Mateo 27:1,2,11-14; Lucas 23:1-5; Juan 18:28-38)

15 ¹Ne kegkepawè dà dutun, is minge punuan te minge memumuhat wey is minge menunudlù te kesuguan wey is minge ebmegurangan te minge Hudiyu, wey is langun he minge menhuhusey, neyun dan ke hengkey is ed-ul-ulahan dan ki Jesus, ne zutun mibakus dan sikandin ne inhaled dan diyà te gubirnedur he Rumanu he si Pilatu. ²Ne si Pilatu, mid-insaan din si Jesus te, “Hadì ke ve te minge Hudiyù?” Ne midtavak si Jesus te, “Uya, iyan is migkagi nu.” ³Ne is minge punuan te memumuhat, mezakel is minge sumbung dan mehitenged ki Jesus. ⁴Ne tenged dutun mid-uman med-insà si Pilatu ki Jesus te, “Wazè nu ve igketavak kayi te mezakel he minge sumbung dan mehitenged kenikew?” ⁵Iyan, wazà medtavak si Jesus te minsan hengkey he insà kandin ne tenged dutun neinuinu utew si Pilatu.

Is Kedhukumi ki Jesus te Kemetayen

(Marcos 15:6-15; Mateo 27:15-26; Lucas 23:13-25; Juan 18:39–19:16)

⁶Iyan neleyaman ni Pilatu is: kada tuig emun Pista en te Kedlevayi, edlibriyen din is sevaha he pirisu he edhengyuen te minge etew. ⁷Ne zuen dutun pirisu he egngезanan ki Berabas, ne haazà si Berabas wey is minge zuma zin, ne midsukul zan te gubirnu ne nekepatey sikandin te etew zutun te kedsinamuk dan. ⁸Ne hein mid-uvey ziyà te ki Pilatu is minge etew su edhengyuen dan he libriya zin is sevaha he pirisu sumalà is neleyaman din, ⁹migkagi si Pilatu te, “Egkesuatan niw ve he edlibriyen ku keniyu is hadì te minge Hudiyu?” ¹⁰Iyan ingkegiya ni Pilatu zutun su netuenan din he iyan ketezengan ke maan is insumbung si Jesus te

menge punuan te memumuhat su egkesina zan kandin. ¹¹ Iyan, is menge punuan he memumuhat, migkegiyan dan is menge etew he iyan dan hengyua he edlibriyen si Berabas. Ne iyan haazà mid-ulaula zutun te menge etew. ¹² Ne zutun migkagi si Pilatu te, “Ne emun iyan heeyan, ebmenmenuwen ku heeyan is etew he migeraran he hadi te menge Hudiyu?” ¹³ Ne nememensag haazà is menge etew te, “Iransang te krus!” ¹⁴ Ne ke si Pilatu te, “Maan? Duen be mezaat he mid-ulaula zin?” Iyan, mid-iseg is kegurub dutun te menge etew he ebpememensag te, “Iransang te krus!” ¹⁵ Ne zutun midlibri ni Pilatu si Berabas wey zin mepenunuat is gehinawa zutun te menge etew. Ne impevugel zin si Jesus ne insugù din te menge sundaru he iransang diyà te krus.

Is Kebpesipelahi ki Jesus te Menge Sundaru
(*Marcos 15:16-20; Mateo 27:27-31; Juan 19:2,3*)

¹⁶ Ne zutun impeseled si Jesus te menge sundaru zutun te turugan te gubirnedur. Ne midtigum dan is tivuuk he kumpeniya te menge sundaru. ¹⁷ Ne migkumbelaan dan sikandin te merigà he kumbalà su ebelvelayen dan sikandin he uvag kun hadi. Ne zutun mibengkulè dan te zugiyen he gawed ne insuup dan diyà te ulu zin. ¹⁸ Ne edtahud dan uvag kandin, ke sikandan te, “Kumusta ka is hadi te menge Hudiyu!” ¹⁹ Ne layun dan edlegkuta is ulu zin te tuked ne mid-ilevan dan, ne midluhuzan dan kun uvag. ²⁰ Ne hein nepezè dan en he ebaleyvaley kandin, midluwasan dan duen te kumbalà he merigà ne insun-ud dan kandin is daan he kumbalè din. Ne zutun mid-uwit dan sikandin pehendiyà te gawas dutun te inged su idransang dan te krus.

Is Kedrensanga ki Jesus Duen te Krus
(*Marcos 15:21-32; Mateo 27:32-44; Lucas 23:26-43; Juan 19:17-27*)

²¹ Ne ziyà te zalan duen nesinugung dan he etew he tigSirini he egngezanan ki Simon, he amey ni Alejandro wey ni Rufo. Heini si Simon, diyà ebpuun te unayan ne edhendiyà te inged. Ne mibpeges dan ipetiang dutun te krus he edtiangen ni Jesus. ²² Ne mid-uwit dan si Jesus diyà te migngezanan te Gulguta, he ke vā dā egkegiya, tulán te ulu. ²³ Ne ibpeinum dan pezem si Jesus te vinu he mid-emutan te tambar he egngezanan te mira, iyan, wazè din dewata. ²⁴ Ne zutun inransang dan sikandin diyà te krus. Mibpemahinbahin dan is menge ugelingen din ne midripa zan dutun ke hengkey is egkeangken te kada sevaha kandan. ²⁵ Liwazè en ebpemenahik is andew hein inransang dan si Jesus. ²⁶ Insurat dan sikan is insumbunga kandin he egkagi te, “Is Hadì te Menge Hudiyu.” ²⁷ Ne zuen dezuwa he tulisan he inransang dan daan te krus. Is krus te sevaha, ne ziyè dan ipasek te zapit te egkekewanan ni Jesus, ne is sevaha zutun, ne ziyà te zapit te egkegivan din. ²⁸ Ne pinaagi

kayi, netuman is netagnà dengan te insurat he Lalag te Megbevayà he edhenduen te, “Mid-isip sikandin he zuma te minge mesinupaken.”

²⁹Ne is minge etew he sumesegazà dutun, ebpemenangàtangà is ed-engitan dan si Jesus, ke sikandan te, “Na! Kunaan nu ke egkegevē nu sikan is simbahan he Valey te Megbevayà ne egkevangun nu te seled te tetelu he andew! ³⁰Libriya nu kun is keugelingen nu ne penaug ka kenian te krus!” ³¹Ne sikan is minge punuan te memumuhat wey sikan is minge menunudlù te kesuguan, iring din ded daan is mid-ulaula zan kandin, su mid-engitan dan daan. Ke sikandan te, “Wey zè be! Nelibri zin is duma he etew, iyan, is keugelingen din, kenè din egkelibri. ³²Sikew is uvag Kristu he hadi dey te minge Hudiyu, penaug ke en kenian te krus ne edtuuwan dey sikew!” Ne sikan daan is dezuwa he inransang diyà te pesikilizè din, ne midsumpalit dan daan kandin.

Is Kebpatey ni Jesus

(Marcos 15:33-41; Mateo 27:45-56; Lucas 23:44-49; Juan 19:28-30)

³³Ne hein neudtu zutun is andew, midtik-ew mebmerusirem is tivuuk he kelibutan seled te minge tetelu he uras. ³⁴Ne hein liwazè en he ebpenaug is andew zutun, ingkulahì ni Jesus is utew mezaging he lalag he edhenduen te, “Ili, Ili, lama sebekani,” he ke vā dā egkegiya, “He Megbevayè ku, maan is ed-iniyugan a kenikew?” ³⁵Ne zutun, is duma he etew he ebpemenhithitindeg dutun te uvey, hein nezingeg dan haazà is lalag, ke sikandan te, “Pemineg kew su ebpengumawen din si Elias is sevaha zuen te ebpeneuven dengan te Megbevayà.” ³⁶Ne sevaha zutun te minge etew is migaanggaan megkuwa te ispungha ne intereb din diyà te sukà ne midtiyuk din te zeisek he kayu ne impaahuk din diyà te vèbà ni Jesus wey zin haazà mesupsup. Ne migkagi te, “Pesegdana niw su ed-ahaan tew ke edlepew si Elias su wey zin ikepenaug!” ³⁷Ne zutun ingkulahì ni Jesus is utew mezaging he lalag ne nevidtawan ne minatey.

³⁸Ne is manggad he utew mekepal he ingkurtina ziyà te seled te simbahan he Valey te Megbevayà, neliwazà mevindas puun te zivavew pehendiyà te zizalem. ³⁹Ne is egalen dutun te minge sundaru he edhithitindeg dutun te egkesineruwan ni Jesus, hein neehè din haazà is kegkevidtawi ni Jesus, ke sikandin te, “Benar he Anak heini te Megbevayà!” ⁴⁰Ne zutun te malù meziyù, duen daan minge vahi he ed-ahà. Ne zutun si Maria Megdelina, si Maria he iney ni Jose wey ni Santiago he zeisek. Ne elin daan dutun si Selumi. ⁴¹Heini is minge vahi, layun dan ebpekiduma ki Jesus ne midtevangan dan sikandin hein diyè pa sikandin te Geliliya. Ne mezakel zaan dutun is minge vahi he nemenduma kandin te kedhendutun din te Hiruselim.

Is Kedlevenga ki Jesus

(Marcos 15:42-47; Mateo 27:57-61; Lucas 23:50-56; Juan 19:38-42)

^{42,43}Ne hein mahapun en dutun te andew te kedtegana he egkesunuzan te Andrew te Kedhimeley, nekeuma si Jose he tig-Erimetiya. Sevaha

sikandin he telehuzen he egalen te minge Hudiyu. Sevaha sikandin te minge etew he ebperateng te kegketuman te nengetagnà mehitenged te kedhadì te Megbevayà. Ne zutun, in-awè din diyà te gehinawa zin is kekkehandek din ne midhendiyà te ki Pilatu ne midhangyù he egkuwaan din is lawa ni Jesus. ⁴⁴Dutun neinuini si Pilatu su maan is utew megaan is kebpatay ni Jesus, ne tenged dutun mibpesuguan din sikan is egalen te minge sundaru ne mid-insà ke minatey en be iyan si Jesus. ⁴⁵Ne hein netuenan din dutun he minatey en iyan, ne intugut din ki Jose te egkuwa is lawa ni Jesus. ⁴⁶Mibpemasa si Jose te meputi he malung ne migkuwa zin is lawa ni Jesus ne mibukusan din dutun te malung he meputi. Ne zuen surung he penlevengà he ingkalut diyà te kelendigan he pagang. Ne zutun din iseled is lawa ni Jesus. Ne midlilizan din haazà te zekelà he watu he idlekeb dutun te penlevengà. ⁴⁷Ne si Maria Megdelina wey si Maria he iney ni Jose, neehè dan haazà ke hendei isavuk is lawa ni Jesus.

Is Kegkevanhew ni Jesus

(Marcos 16:1-8; Mateo 28:1-8; Lucas 24:1-12; Juan 20:1-10)

16 ¹Ne hein neiwas dutun is Andew te Kedhimeley, si Maria Megdelina, wey si Maria he iney ni Santiago, wey si Selumi, mibpemasa zan te pehemut su edhendiyè dan te penlevengà wey zan ikehaplas haazà is pehemut te lawa ni Jesus. ²Ne te meselem dutun te iyan pa kedsilà te andew zutun te egkehuna he andew te simana, nemenhendutun dan te midlevengan ki Jesus. ³Ne ebpein-inseey zan te, “Hentei is ebpekelilid kenitew zuen te zekelà he watu he inlekeb duen te idselang te penlevengà?” ⁴Iyan, hein midlingehè dan, neehè dan he nelilid en sikan is batu zutun he utew zekelà. ⁵Ne mid-ahuk dan dutun te idselang te penlevengà ne neehè dan is ebpimpinuu he menguhed he etew ziyà te egkekewanan dan he kukumbalà te meputi he manggad. Ne zutun nekehuyab is gehinawa zan. ⁶Ne migkagi haazà is etew te, “Kenè kew mahandek. Ebpen-ahaan niw si Jesus he tigNeserit, sikan is inransang te krus, iyan, wazè en dini su nevanhew en. Ahaa niw man kayi te midsevukan kandin.” ⁷Ne te kegkeipus te ked-ahaa zan dutun, ke sikandin te, “Hendiyan kew en te minge sumusundan din ne kegiyi niw sikandan wey si Pedro he si Jesus, edhuna sikandin diyà te Geliliya ne ziyè niw sikandin egkeahà, sumalà is migkagi zin keniyu.” ⁸Ne zutun nemengguwè dan dutun te penlevengà is ebpemelelaguy su utew zan nengeinuini wey nengehandek. Ne tenged kayi wazè dan tudtula heini ziyà te minsan hentei su nengehandek dan.

Is Kebpaahà ni Jesus ki Maria Megdelina

(Marcos 16:9-11; Mateo 28:9,10; Juan 20:11-18)

⁹Ne te meselem pa utew zutun te andew he Duminggu hein nevanhew en si Jesus, midhuna sikandin mebpaaahà diyà te ki Maria Megdelina,

sikan is bahi he mibpeguwaan din dengan te pitu he mezaat he mulin-ulin. ¹⁰Ne heini si Maria, mibeyaan din is menge sumusundan ni Jesus. Ebpeininegew he egkengeseeng haazà is menge sumusundan ni Jesus tenged te kedhimetayi ki Jesus. ¹¹Ne hein midtutulan sikandan ni Maria he neehè din si Jesus su nevanhew en, wazè dan tuuwi.

Is Kebpaahà ni Jesus Duen te Zezuwa he Etew
(*Marcos 16:12,13; Lucas 24:13-35*)

¹²Ne neiwas haazà mibpaahà si Jesus is nahalin is dagwey zin diyà te zezuwa he menge sumusundan din dutun te edhendiyà haazà is dezuwa te unayan. ¹³Ne midlikù dan diyà te Hiruselim ne mibpenudtulan dan is menge zuma zan he neehè dan si Jesus, iyan, minsan pa zutun wazà medtuu is menge zuma zan.

Is Kebpaahà ni Jesus Duen te Menge Sumusundan Din
(*Marcos 16:14-18; Mateo 28:16-20; Lucas 24:36-49; Juan 20:19-23*)

¹⁴Ne zutun, mibpaahà daan si Jesus dutun te sepulù wey sevaha he menge sumusundan din te timpu he egkekaan sikandan. Midsawey zin sikandan tenged te kezesen te isip dan su wazè dan medtuu te menge etew he nemenudtul he nekeahà kandin he nevanhew. ¹⁵Ne zutun migkegiyan ni Jesus sikandan te, “Penhipanew kew ziyà te tivuuk he kelibutan, ne ipesavut niw is Meupiya he Tudtulanen diyà te minsan hentei he etew he linimbag te Megbevayà. ¹⁶Ne sikan is edtuu kayi wey ebpebewtismu, ebegayan te untung he wazà pidtemanan. Ne sikan is kenà edtuu ne edhukuman te silut. ¹⁷Ne sikan is etew he edtuu kediey, duen menge singyal he egkehimu zan. Pinaagi te kegehém te ngazan ku igkepeguwè dan is menge mezaat he mulin-ulin he ebpenlalung te menge etew. Ne ebpekekagi sikandan te kinégiyan he kenè dan egketuenan. ¹⁸Ne minsan ke ebpekegawed sikandan te menge uled wey ebpekeinum sikandan te minsan hengkey he edhilu, kenà sikandan egkekeizan. Ne emun edempan dan is egkengezeruwan, ne egkengeulian.”

Is Kegkevatun ni Jesus Diyà te Langit
(*Marcos 16:19,20; Lucas 24:50-53; Nengeulaula 1:9-11*)

¹⁹Ne te kegkeipusa te Nengazen he si Jesus dutun te menge lalag din, mibatun sikandin pehendiyà te langit, ne mibpinuu ziyà te egkekewanan te Megbevayà. ²⁰Ne zutun nemenhipanew is menge sumusundan te Nengazen he si Jesus ne impesavut dan is Meupiya he Tudtulanen diyà te minsan hendei. Ne is gehém te Megbevayà, mid-ugup kandan su nemekehimu zan te menge egkengein-inuwan su wey memeketuu is menge etew zutun te ibpesavut dan.